


蓼園詩鈔



癸亥冬月

養園詩鈔

寒厓





鳳孫先生七十四歲小影

馬

蓼園詩鈔序

膠州柯鳳孫先生積學能文名被海內外年七十著新元史刊成翔實視舊史爲勝日本得其書付文部評定咸推服以爲不可及贈以文學博士先是東海徐公以總統得文學博士於鄰邦而先生繼之予謂是可以洒吾國羣士失學之恥要不足爲先生道先生之蘊非可以史學盡也光緒初予遊京師因孫君佩南鄭君東父獲識先生知其精小學而已後十餘年再見於京師先生方與東父共治春秋見予文論喪服諸篇而善之別去予歸里先生出督貴州湖南學政又十餘年而宣統改元予官學部孫鄭二君皆前卒先生獨巍然幸存天下擾擾復十餘

載予與先生浮湛燕市無所聊賴日取先聖遺
經發憤研誦務明大道之原存已壞之人紀期
至老死不悔先生治穀梁春秋予治毛詩繼治
易治尚書及孝經大學中庸以逮老子皆賴先
生得就其業凡予之爲說有創獲先生未嘗不
欣賞有謬義亦未嘗不糾也蓋學問之事有本
末焉傳云正其本萬事理豈不信哉六經者學
問之淵海也先生之學其深於經乎本經術以
制行則行潔以爲詞章則其言立先生躬道棄
榮不以高節自矜而獨致勤於災賑所全濟甚
衆性喜爲詩顧不苟作廉君南湖爲錄存五卷
將刻行先生曰子爲我序之予不能詩然能粗
知先生之學行故述其離合數十年之迹後之

讀者不以詩求先生而先生詩所由工可知也
己癸亥季冬桐城馬其昶序

蓼園詩鈔題詞

廉泉

二百年來此健者看君史筆寓於詩舊游季重
渾如夢後世子雲更有誰歷歷陳編空自許悠

悠天步欲何之曾同祭酒談天寶悽絕城南柳

萬絲廿五年前公與伯希祭酒同作小萬柳堂
長歌四十二韻江南吳布衣觀岱為補圖

庚子之變流落人間公
詩未留稿不能記憶矣

堂堂一代風騷手鶴骨孤撐意自閑夜覓舊題

依佛座曉聞天樂憶魚山過我申江別業及題
姚少師山水卷子二

首今於集
中得讀牽腸朋輩飢難忍回首觚稜路絕攀

片念微茫誰共語鐘聲和月振幽屨

其公心猶未結其時雖難惟日自新也
中書錄事兼判南天學事魚伯
堂堂一公凡歷千言骨
其然
軍
二百全
其國若

蓼園詩鈔目錄

卷第一 五言古凡七十首

程符山閣韓兩先生祠

偕蔣甥友善游程符山

初晴至西原卽事寄宋晉之

城西道中望郭丈荔岩村居愴然有作

晚出西郭懷徐山人象蒙寄以詩

七月朔日過高仲城十刹海新居

留別盛伯希祭酒

荅王一卿同年

送王一卿

晚泊興集

飲丁六齋園



目録
寄韓息舟

贈徐梧生

紫泉

為馬通伯題張魏公三省堂硯

與伯希晚至三泉寺飯

平谷西山故劉秀才隱居

寓法華寺秋夜書懷簡王廉生前輩

循雞足山北行石室清潭上有龍祠伯希屬作

詩

逾山至天成寺

盤山行宮

雲罩寺呈伯希

偕伯希過王山人家同訪金泉公主墓

和子秀

徐菊人河西春眺圖

遣興二首

白丁香花

秋大雨新城半為澤國舟行訪許石齋

三泉寺

灤預堆

代寄二首

武勝關

訪徐山人象蒙隱居

再寄徐山人

贈子秀

自峽口至荊州作

陳家渡

渡長湖

江行

春日成都郊外和王元達二首

舟中望武昌府

長沙試院作

渡洞庭湖

自永順返道中作

常德道中作

鳳灘馬伏波廟

泊礪石

台州城外過楊明經隱居同至釣魚山尋南宋舊城

忠山

六月五日晚泊南洲廳

永順府

北行

除夕感膠州灣近事寄于華峯同年

登白雲山

親音山朱鼎甫前輩寓齋

登鐵塔

秋夕感懷三首

龍洞

徐菊人北江舊廬圖

壬子後余與呂戒庵過從最久臥病旬日未通音耗病愈訪之戒庵已盡室東歸愴然有作不

必寄戒庵也

春禊日偕同人汎北海

賈來臣至兗州偕登少陵臺有作

過吳六處士邨居

飲賈來臣園中

過天津追憶前總督陳筱石同年事寄以詩

卷第二 七言古凡五十首

紡車

伯希祭酒股疾問以詩

贈郭二丈立言

高南阜西邨烟雨圖

寄孫佩南

寄劉子秀孝廉宋晉之太史

高翰生臨桂未谷先生說文統系圖

姚少師爲徐中山王畫山水卷廉南湖屬題

寄王子丹

寄蓋鳳西

送陳蓉曙南歸

王鈍夫以元人重摹蘇文忠公零泉記搨本見

寄賦詩謝之

秦權拓本爲寶沈庵題

仇十洲仿宋人漢光武渡滹沱圖

哀城南

後哀城南

石龜爲豫錫之都統作

車遙遙送敬孺長兄二首

丹邱雙鉤墨竹爲宗人輔周作

贈謝叔璠

宋徽宗畫鷹爲方柳橋題

成都阿文成公祠

釣魚城行

大渡河行

爲劉健之題蜀石經搨本

劍門雨後黃瀑布最奇記以詩

吳三桂僞玉璽拓本

紅人菁

李莘夫山中讀書寄以詩

徐榕生以郎山詩見示題其後

戚武毅刀爲王廉生祭酒作

伯希游小五台歸示紀游詩八首以長句題之

延子澄來蜨軒

爲羅叔言題攻吳夫差鑿拓本

郭湘帆聽松草堂

高翰生金泉校書圖

徐鼎霖省長爲其尊人追繪山居課子圖屬作

詩

匡鶴泉侍郎畫竹

戴海珊墓廬讀書圖

劉梓謙建南行役圖

嘉祥縣

葉煥彬麗樓藏書圖

圈魚

徐梧生宅看牡丹

青檀寺

嚴紹光西湖雅集圖

為李一山題黃小松所藏唐搨武梁祠畫像

徐梧生鵲山寒食圖

為周養安題其尊太夫人篝燈教子圖

卷第三 五言律凡一百廿四首

對月

真源寺遇文一丈端甫

鹿邑道中

遂平城外送孫佩南

寄景縵史

早行

西平縣裴晉公祠

訪劉惠卿金泉精舍

劉子秀書齋

故吏部侍郎膠州匡公輓詩二首

寄梧生

曉發正定府

井陘

彭山舟中作

石門驛

越雋道中

清溪縣

嘉定府試院小亭子為南皮張中丞造有水木之勝記以詩

予美寄郭蓉汀

凌雲寺二首

涼山

同顧復初錢王廉生卽席作

泊歸州

梅花二首

山海關二首

松山

烏拉街

永平道中寄王石隲

耶律文正王祠

送胡壽山之吉林兼寄吳清卿太常二首

通州八里橋

夜坐朱子祠簡丁少山

簡徐菊人同年

傅衡堂園居

送子秀

新城書院寄九弟

蘆溝早發和伯希作

新城道中寄梧生

伯希游百花山歸贈以詩二首

寄敬孺長兄登州書院

三哀詩

三首 左忠壯公寶貴 鄧壯節公世昌 壯愍公永山

送安小峯前輩二首

九日晏江邊卽席有作

薄裕軒觀音山後書齋

黃浦送朱鼎甫前輩

寄宋晉之

邠州

簡管士修

晚郊卽事

昆明池

寄杜仲丹

聞段西圃北歸寄以詩

簡朱純卿太守

白魚圻

常德寄門人閻鎮珩明經

郴州道中

澧州阻雨

泊零子口

頤和園值日道過張秀才書齋呈管士一祭酒

會稽王子貽其尊人爲鄞縣學官母病子貽乞

以身代自沈於鄞縣之月湖母病竟愈此同治

二年事也哲兄子獻屬作詩二首

耆壽民侍郎見山樓

東光縣董子祠

日本雜詩十首

黔中秋日書懷四十韻

過鎮遠謝秀山太守招游南山卽席作

貴陽署中作簡吳梅孫

過河道口故居遂登畿輔先哲祠高閣卽事有
作

丁巡卿總督輓詞二首

卽事

姚邨早發

金鄉道中

野望

蒙山簡飴山侍御

謁曲阜聖廟

子貢手植楷樹

寄徐梧生二首

厯厯

憶昨

歎息

昔者

漢家

資江

垂簾

賈來臣邀集單父臺賦呈三十韻

瀛臺

團城

北海

佛寺

王飴山京寓書齋

園中雜詩八首

歲暮無懔感傷存沒作懷人詩四首

晚過新民屯飲王進士書齋

爲丁黻臣題召穆公太保鼎搨本

卷第四 七言律凡八十九首

七夕抵蒲州府偕韓二州登驛館亭子

成都

登樓

舟中望佛圖關簡楊福孫

孫水關

送楊福孫

泊峽口寄宋晉之

宜都城外作

金山寺二首

過廉南湖申江別業

玉真閣

郭湘帆同年招飲卽席作

送孫六皆

丙午過膠州故居作四首

安陽城外作

團山

觀音嶺和韓人金君平作

書院秋雨兼旬排悶裁詩寄郭蓉汀

寄王惺齋

九日偕徐伯縉登毘盧閣

寄孫佩南

真定大佛寺閣子

寄李壽林

紫泉行宮

滬上山東會館落成祀至聖先師恭紀以詩

三河道中寄崇文山前輩
簡蔡崧甫

涿州王家店和伯希

從平谷至盤山宿僧寺

和伯希寄王山人作

書伯希四上舍生詩後

寄徐梧生

展舅氏李吉侯先生墓

宿霍家坡

旅夜遣懷

贈李莘甫

偕梧生赴定興道中作簡伯希

過元達小園

詠史三首

抵陝州聞車駕西幸已至長安

送端午橋之河南

送夏伯定

人日偕徐菊人集安覺寺

送管士修之永平府任

浮雲

老健坡阻雨寄文仲恭

病起登後園閣子

寄白澄泉

岳州旅次初見二毛寄梧生

辰龍關

旅夜書懷寄敬孺家兄

晚泊鎮江寄張華臣

頤和園值日道中簡管士一祭酒

卽事

卽墨諸生韓君以所居劃入租界自縊以詩弔

之

頤和園值日晚步湖上作

簡莘甫

鎮雄關

自題來鶴樓

簿領

簡吳梅孫

鎮遠城外作

出城送客簡謝秀山

酬澤之居士

寄王葵園前輩

再入史館簡惲薇孫學士

八月二十三日奏封事待漏直廬簡胡素堂御

史

寄王飴山

詠蟬和梧生

奉天城外卽事

定興鹿文端公墓下作

詠史

讀三國志董卓傳

春日郊行卽事

團城

十年

秋日園居即事寄通伯

簡外弟吳辟疆

遣興

寄龐劬庵中丞

上元日作

還離縣檢孫佩南遺書得其未寄函題以詩

徐小山中丞畫像

卷第五 絕句凡六十九首

唐明宗祠

章邱道中二首

新城書院即事

敬孺長兄長江霽雪圖二首

又魚子簡徐伯縉

記夢二首

繹夫詞三首

瀘州二首

題袁錫臣行草冊子二首

過湘陰縣黃陵廟

岳州城外作二首

三絕句

涑水縣石龜山

簡郭子嘉丈二首

和郭湘帆二首

湖上晚興二首

成都雜憶十首

馥孫作雪裏梅花扇面成都無雪戲作一詩
張韻舫眠琴室填詞圖

寄梧生

趙伯康畫雨後秋海棠極零落之態作詩題之

二首

三絕句

郭心正文墓下作

莫送灘詞二首

寶沈庵上元夜宴圖二首

村居卽事

趙伯綱畫扇面

徐總統畫江湖垂釣冊子

種膠州白菜

讀北周書二首

詠史二首

卽事

贈文星階閣學

沈詠孫畫

劉文清公槎河山莊卽事詩卷子

題陳梅村書札後

題松小夢殘荷野鴨扇面

輓奉新張忠武公二首

書沈子敦侍郎書札後

丁亥秋重過金泉精舍留信宿而去追懷曩昔口占二絕句記之

蓼園詩鈔目錄

蓼園詩鈔卷第一

膠縣柯劭忞撰

無錫廉 泉編

五言古

程符山閣韓兩先生祠

尋山紆近賞杖策登雲岫僧藍架屢屨俯挹西
澗溜考槃留逸躅林壑增天秀丹甍侈蒼苔地
尚茅茨舊乾嘉全盛日才俊咸輻輳考功旣自
免來安亦解綬真儒鏗名迹推分任所受寧知
德不孤相期百年後翰墨猶仿佛樵蘇時逗遛
我投祠下宿再拜觴新酌堂前兩梧桐離立覆
修霽向晚席其間清風滿襟袖
偕蔣甥友善游程符山

程符爲地肺可以弗不祥林掃蛇虺毒厓叢杞
菊芳修坂東逶迤土石艷有章倏如錦翮舒垂
天負朝陽倒映滄海碧百里無崇岡僕本羈旅
人奔走窮殊方幸及弛擔暇偕爾同倘伴採藥
梯風磴尋僧館雲房秋窗山氣入夜枕燈影涼
夙昔抱微尚投老終不忘鷦鷯栖一枝取足在
榆枋峨峨閭與韓近有讀書堂當年絃誦士抱
甕精廬傍

初晴至西原卽事寄宋晉之

首春雨雪繁新陽氣尚闕林際拂鳴鳩簷端晃
朝晰散帙厭疲勞暄郊乘節物渚蘋葉初合岸
柳稊俱發妍辰漸葱蒨離懷終拂鬱冰開網陟
魚凍釋鬪苞蕨勝游如昨日垂垂已華髮矧我

素心人沈憂彌歲月支離酒應困閒關夢屢失
醇醪諒易醒長途信難越曷用答綢繆緘詞當

書札

城西道中望郭丈荔岩村居愾然有作

田家霜露重蚤起畏霑濡曠曠原上日已出東
南隅涼野寒晨色焜黃辨林墟平疇交麥壠側
路緣瓜區前登西山麓望見中田廬夙昔衡門
下邂逅褊衣裾蓬蒿誰復翦井徑久應蕪憫憫
懷人意悽悽感物攄平生推獎分羈紲許狂愚
庶幾慰九京不乞播間餘

晚出西郭懷徐山人象蒙寄以詩

回風颺稷雪曾雲倏離披遠天闇復晰掩映桑
榆時問余何所適愛此寒林姿彘兔伏深叢鷓

雞鳴正悲若人抱孤尚葺宇臨蒼陂願言一携
手契濶逾二三葺衰草覆町疇枯莖帶藩籬想象
山村暮物色正淒其植身有榮瘁蹈道無險夷
誰謂蘊藉淺待汝共栖遲

七月朔日過高仲城十刹海新居

金天候初交畏日仍炎赫凌晨駕短轅問汝湖
上宅苔痕淨階砌水氣涼茵席登樓恣暇眺放
目盈秋色晚樹尚扶疏鳴蜩已蕭瑟陂塘何所
有荷蕖紛狼籍前夜風雨來獨立非汝責華落
實將披感物增心惻吾儕本疲駑未受羈銜迫
嘯詠得良朋流連忘暝夕儒行論更僕鹵莽無
一得終當返敝廬抱甕清澗側
留別盛伯希祭酒

按此詩則恭忠親王之罷樞相
乃出意園面奏留院作意園事
略不記此事
意園於光緒十年三月十八日有清收
回鷓邸高亦軍機處緊要事務成
命一摺是意園不獨劾恭邸亦甚
不滿於福邸也

海風西南來兵氣千里赤諒山既潰敗宣光復
辟易可憐債軍將白頭社金革側聞推轂時倉
卒非所擇先生據讜論聖主為前席中樞俄一
空親賢猶切責篋中無諫草為余誦副墨芻蕘
何所獻竊效千慮得嗚呼咸豐未隱忍圖宗祏
翠華竟不返往事填胸臆低顏事國仇志士應
踟躕人心錮偷懦扁倉窮葑石期君侃直辭抉
剔膏肓積驪駒晚在門桑榆候太白狂疏不自
料臨別增感激

荅王一卿同年

君言趨府吏戢戢魚銜尾喧闐倏一空又似階
前螳頻繁責簿領殷勤謝筐篚量材真樸慙滕
口但萋斐甯論妾婦羞僅抵兒童偉逝將投劾

去歲月今餘幾賤子媵一觴知君採葑菲牽牛
開滿架萋萋兼鞞鞞露衣未濡鈞簾月初朏
得酒更選肴買魚腮貫葦乘時彼何似適意吾
甯匪更欲對牀眠論詩窮豐豐

送王一卿

昔在同治初青徐盜如蝟竹林有頗牧桑梓稱

莘渭

一卿伯父按察君世以王佐之才稱之

環攻賊亦狡力戰君

尤毅縫掖自恂恂兜牟仍暨暨海隅旋清宴凶
妖俱蕩漑第賞不酬勞待祿甘辭貴飄搖凌河
沐栖遲儕簿尉捧檄俄三年摻袂堪一喟鳶肩
徒自負雞肋終無味投轄罄賓歡典衣償酒費
捷給鬪朝該喧闐忘忌諱君家東墀上修庭翳
蒿蔚壺觴父老迎燈火妻孥慰新阡薤戰骨故

壘餘兵氣往事何足論衰遲君尚未

晚泊興集

洲回風偃席岸近泥翻槩破堰洪濤入荒墟叢
芮長歲晏景蕭條天寒氣悽愴逝川帶夕曛滔
滔與東往青蒲闖水出白鳥銜魚上涸痛逾十
稔鋤耨換罟網曷以澹沈災濬距今猶曩用世
益艱難勤民徒想象夜闌不成寐欹枕聽方響
飲丁六齋園

夕映在高隅蕭條飛雨歇林端鳥聲樂檻外荷
香發漸覺水風涼新秋尚衣葛

寄韓息舟

遙知東郭外寂寥窮巷雨積潦浸階除回颺捲
林莽爨煙溼更低飢烏蒼上語

贈徐梧生

西溪無十里夾岸皆蒲萑上有孝子邨翼翼高
林端攸然縱水鱗歎彼凌風翰衡門吾所適遑
論藹與寬徐侯循岸至竝坐垂綸竿雖非游沮
洳未必釣鯢桓揚帆析木津東浮大海瀾寄與
滄洲客臨淵安足歎

紫泉

乾隆初建
行宮於上

昔聞紫泉水一變如丹砂占爲聖人瑞六龍飲
其涯我來冰未泮腹澤膠枯槎父老向我言敝
邑猶郇瑕自從稅鑿輿百里皆桑麻膾鯉登春
網燁兔翻秋罝導我陟前岡怪石何哈呀周墉
無遺堵積水成凹注尚有橫經廬飛簷竦衙衙
高宗南巡狩沈災澹龍蛇緬思黃屋來七

萃如雲赧供張却二輔率舊匪增奢雖云物力
豐玉音猶咨嗟頌聲今未寢事往逾奔車閭閻
日凋瘁剝剔窮癡痂况聞平樂觀講武禡高牙
經營雖勿亟百萬委泥沙猾夷尚馮陵姦宄亦
萌芽此邦軸川陸信美非吾家城南屯曠騎日
暮催清笳

爲馬通伯題張魏公三省堂硯

不登三省堂猶藏一片石摩挲廿九字劖心爲
篆刻仿佛見英靈衡山風雨夕

與伯希晚至三泉寺飯

一徑如修蛇宛延沒秋草意往愜所期自然散
襟抱人從莽蒼返路傍崑巖繞天垂暝色外西
北看歸鳥陟嶺已盤紆緣溪尤窈窕流螢倏照

灼宿鷺時驚矯扣關造蘭越魚殮聊共飽畏虎
不敢言但云霜露早王孫宗室彥支離就枯槁
且枕曲肱眠臨窻月皎皎
平谷西山故劉秀才隱居

積水自成淵疊石各爲厓下有馮夷宅上有隱
君栖林中披徑術赧外構庭階巖居無四鄰應
門但萊妻若人曠世姿卓犖抱奇懷鹿豕非我
羣邈與風雲偕精爽猶仿佛巾卷已湮薶林軒
網蛛蝥水檻宿鳧鷖覽物增悽惻徒爲達士吟
猶當訊靈修歲暮儻歸來

寓法華寺秋夜書懷簡王廉生前輩

候蟲猶在野露降風初寒開軒納沆寥月上高
林端夜闌羣動息丹鳥獨飛翻玉繩挂罽恩參

旂拂井榦予本蓬蘽士徇祿守微官蠹終謝高
尚屯初利盤桓祇園信清曠宴息有餘閒君從
秉燭游予撫鳴琴彈寤言各有適寧爲去矣歎
循雞足山北行石室清潭上有龍祠伯希屬作
詩

密樹夾清溪但聞泱泱流徑泥深沒胷壘足循
巖陬中函剝穹窿外蔽纏天樛泠泠仄出泉滙
爲百步湫王孫偕我至愛此一泓幽蛟龍移窟
穴出沒賸游儵物微但自營禱祀欲何求不聞
畎畝士畀以蒼生憂聊復濯塵纓庶幾滄浪遊
逾山至天成寺

石梁亘逶迤樵蘇知路負艱岸斷朝赧寒潭留
夕映斑斕濯緜綵蕭瑟涵虛聽褰裳躋險滑連

巖歛奔迸削成有匡隳斗下無梯磴反顧杳深
沈但覺松陰暝山僧遲客至林端戛清磬始信
千仞上風雲通術徑

盤山行宮

神都有盤嶽先朝親狩獮沸天萬乘來雲旂塞
徑峴張帷原隰沓列蕤厓垠剗山祗驅猛獸往
往蹈躄罕當年七萃士赳赳萬夫選袒裼搏爪
牙血毛恣蹋踐前禽筮顯比二驅旋翠輦宸居
何嵒嶮層宮凌絕巘旄頭扈岩局象輿橫宛儼
甯知百年後周道嗟車棧尋碑螭首倒登堙龍
尾斷輦路久榛蕪陞楯生苔蘚恭惟三田禮昔
重今則緬守成易陵替何人掌邦典
雲罩寺呈伯希

盤盤復盤盤日莫憩雲端誰言登頓劇炳燭猶
餘閒踐苔嫌露滑汲水覺天寒齋厨淪新茗聊
欲開襟顏天河案北戶斗柄垂闌干不知偃息
高俯視何漫漫寤言匪獨宿甯爲碩人歎
偕伯希過王山人家同訪金泉公主墓

曛曛旭日出寥落殘星沒風露曉淒淒桑麻秋
鬱鬱隔溪喧水碓傍岸開蓬華田家遲刈穫主
人夙盥櫛聯袂出郊原褰裳尋徑術藉草作籛
除援條爲柳栗旣侑山人酒又和王孫筆其西
嶺益峻迤北涂尤蕪激浪擺哈呀飛淙澆岬岬
不覺灘湍壯但聞風雨疾林響雜颼颼客心增
僚慄言訪栖真地尚有燒丹室石竈閱金棺雲
局薶玉質岸谷已遷移音塵儼仿佛父老向我

言軼事難具述月下聽笙簫水邊見巾拂金源
昔板蕩青城尤辱屈纍俘連九族徽欽同一律
甯知糞土叢不到煙霞窟遯世有神仙采葯餘
苓木鱖生信疏譴夙尚耽遺逸稻梁羞雁鶩湯
沐嗟蟣蝨世亂不可爲身退仍難必邂逅獲良
朋栖遲儻異日不用醉清尊還宜戛瑤瑟

和子秀

璇璣斡四時誰如斗柄力周回無轍迹春往秋
復及高林葉未彫寒蟬鳴漸澁五色耀甘瓜重
穎垂嘉稷壯懷愉沈蕩衰情感蕭械豐豐蓬廬
士羣書殫篋積荆玉雖三獻燕石終十襲得失
曷足論窳隆有遷易蜉蝣學軍征蟋蟀催夜織
時哉不我與勞勞竟何益

徐菊人河西春眺圖

河內走京師大道直如繩奔車劇奔電擾擾無
寢興而余游宦士稅駕爲良朋攜手出城隅愛
此長川澄是時暮春交斐斐暄氣升西山無根
蒂突兀但高棱言緡釣莓渚薄采循芳塍宴息
忘曛昃城陰過漁罾誰將十里陂濡染上吳綾
對岸兩三人呼之儼可應緬彼漁樵侶同游豈
吾曾君有躬耕約茲言匪所承海隅未清宴鱗
介日馮陵曷不發鈴韜拯彼黎與烝賤子蒙庥
蔭他日解行滕

遣興

春風如故人遲汝久不來何時入中園吹我桃
李開長安二三月九陌翳黃埃見此灼灼華頗

憶昔年栽遙知海上邨井臼生蒿萊敝廬竟何
有茫然使心哀

我本邱園士躬耕常苦飢譬彼穴中蚓已出還
無期問我何所營十年走京師問我何所學拘
閔匪通時山中有故人詒書惠良規慎勿思鄉
井方爲居者悲

白丁香花

蓬蒿仲蔚廬國三月無春氣素萼忽蕤垂嫣然傍
階砌城隅有靜女青裙映縞袂勿嫌嫁事晚耿
介心苦異君看穠李姿零落先委地

秋大雨新城半爲澤國舟行訪許石齋

城南何所有蒲葦浩冥冥城西何所有落日千
山青中間大如礪或是古酈亭水木爲墟落牽

堵高矧嶢拏舟訪故人開軒面雲汀十日山中
雨百川劇建瓴農事未登場寧論鬲與并島夷
方旅拒魚鼈逐東溟昏墊不猶愈孰若汚羶腥
耒耜挂前簷尚獲腰笈管霽色升地表北風蕭
泠泠連娟月倚岫逶迤斗戴垆勿辭良夜飲明
日至適屏

三泉寺

三山如雞距登之峻且長三泉如牛乳飲之甘
且芳尋山谿路絕詰屈得微行甯知巉巖腹中
爲稷稻鄉真僧識奧區翦薙營寶坊到今挂錫
地淋雨頽紺牆事往閱成壞興發增激昂僕本
田野姿未覺祇林荒寒條剝園實摘花弄水香
男兒旣墮地百憂入膏肓得爲一日娛宵然若

相忘幽尋匪不愜風塵浩茫茫側聞盤山麓近在洵水傍明朝攜柳栗更越西南岡
灑預堆

大江一浩蕩勢欲襄荆楚灑預塞其門屹立如塹堵白鹽與赤甲左右相撐拄上有疏鑿痕蛟龍敢熒侮大編汎中流劈浪劇箭弩憑陵眩出沒捷疾迷仰俯鬣鱗儼可捫性命拚一賭榜人醜酒賀坎坎鳴神鼓出險尚征營不寐兼懷土扞關蹙成家號亭浦漢主往事何足論艱難到羈旅猶堪慰長夜銜山新月吐

代寄

秋風今夕至高梧葉初凋月出涼露白的的在蘭茗念彼辭鄉士勝屨客三遼七月冰塞澤八

月雪封條一別經年歲俯仰如崇朝勿裁綿絡服塞上有狐貂水苻逐流波縈帶在一時豈無纏綿意去住兩參差君行四五載棄我忽如遺牀下生委黍燈前鳴絡絲匪席不可捲匪石不可移耿耿一寸心祇有歲寒知

武勝關

朝發清淮滋暮宿黃峴陰輿轎逾鄭阨峽路陷且深島夷龕北略索虜拒南侵昔紬成敗史今拓縱橫襟分巖各爲塞積竹自成林團欒霜露色颯遯悲風吟亮無曠達懷俯仰增蕭森守邦雖設險智勇互陵臨猶欲論形勢旅館侑孤斟訪徐山人象蒙隱居

荒陂葭菼晚采采霜露多遠浦明積水夕陽在
斷荷欲問陂上宅無人載酒過

再寄徐山人

商聲索索起縣知林葉下燈影出風簾寒雨鳴
秋瓦思君詰日來采菊香盈把

贈子秀

昔與二三子避地游程符奔迸咸豐末栖遲同
治初劉侯佔畢士六藝知權輿訪我衡門下散
帙忘飢劬徐戎復北來井邑變邱墟昔爲橫經
室今是蓬蘽區我從稷下歸歲暮臥田廬相攜
隴畝畔桑柘尋遺株悲風捲地起凍雨沾衣裾
狐狸返故穴將去猶躊躇亮無四海志感槩竟
何如

自峽口至荊州作

峽中氣候暖芳樹經冬綠杪臘逾荆門始覺霜
意肅風急帆檣偃水落匡垠壘回回激浪奔汨
汨流沙伏乘陵俄頃間白日移川陸登艦眺楚
甸涼野無樵牧澤國際平蕪江村帶疏木緬思
涪水上井里如在目誰使躬耕者奔走干微祿

陳家渡

江天日初沒茫然生旅愁落帆衆色晚野迴風
修修寒鄉四五家斷岸連孤舟沙汭分漁爨樹
杪懸津樓我行無程期掃榻爲淹留詢涂盜賊
劇逢人顏色柔荒梗良可畏惜此柴門幽猶堪
娛寂寞獵火上昭邱
渡長湖

溇雲暗長波泄日帶高梳云云百里湖振楫風
吹衣東浮窮夏滋西涉達荆灤沓浪無端倪積
眺入孤飛盪舟逾溟滓水天始相違翻思理權
時安知今所歸慎矣當路子甞勉在中達

江行

江容遞顯晦彌望無津涘扁舟欲何之潏泱浮
雲起晨帆雨雪外夕榜風颺裏憂來不能寐波
濤偏入耳追思別家時拊枕歎不已上堂拜嚴
親倚榻問病姊

春日成都郊外和王元達

春耕始解衣初陽暄氣動雖無四體勞已覺衣
裘重徑泥晴漸釋江湍晚愈洶麥壠帶蔬畦青
黃紛錯綜節物乘熙怡憂襟忘倥傯信知橐筆

客仿佛游梁宋

瘠首畏春寒天界風日美渙渙水初生蓬蓬烟
正起江皋宜騁望弭櫂沙洲尾野卉發新萸岸
樹栖餘蕊蟄雷應早動園林遲雖雉已見麥煢
煢還期桑葚葦

舟中望武昌府

日出澄霞闌風高寒霧歇弭櫂竝湖埂解纜回
林末蕭蕭鉦吹動灑灑連檣發陽侯歛洶涌江
豚互興沒我從沌口來登臚望大別飛樓翔天
際百里猶端嶮緬思盜賊平太息曾胡烈微管
竟淪胥橫流賴時哲暨暨功名壯滔滔江漢逝
宴坐彼何人高談自矜伐

長沙試院作

長沙卑濕地初秋尚蒸鬱纖絺逾挾續涼堂同
燠室校閱有程期揮汗仍濡筆芸苗病夏畦劇
甚耰鋤役聊且散疲頑居然逃暇逸雨餘暑氣
斂清商始應律涼飈樹頂來華星雲隙出巡廊
窮窻窳倚檻梢蒙密勞生信有涯致用終無術
炳燭儻餘閑蕭然偃蓬蓽

渡洞庭湖

朝辭長沙渚晚泊湘陰澁挂席南風正連檣中
夜發彌望但空澄水天共明月誰將玻璃盆擲
作蛟龍窟掩抑參旗沒低昂斗柄揭夜闌無夢
寐靈怪通恍惚平明見君山滄波環一垓想象
羽人家天雞喚啁晰生涯本浩蕩思與安期逝
借問海濱人何如汎溟渤

自永順返道中作

難長不可逾山行僕馬瘖昔往未徂秋今歸雪
在途西浮漚沅澧北陟蟠荆巫水涸增厓隙野
盡餘凋枯此邦信樂土俗嗇民忘痛丁丁入林
斧濺濺施川瓜余本衡門士遠迹漁樵俱敢云
王事勞疲駑慚高衢躋躋歲云暮栖栖楚塞隅
曷以整繁憂戢影在桑榆

常德道中作

久爲湖外客旅涉殫疲勞冬嚴斲冰雪夏漲陵
波濤弭櫂涉陽浦秣馬方林皋露夕奉芳杜霜
晨聽哀猿沈淵弔屈放避世緬秦逃卜居終未
決尋源豈再遭揆予疏劣質望古增鬱陶仕隱
無通軌譬彼泳與翱陳力誠疲駑徇祿彌貪叨

且就靈氛筮裡享苻溪毛

鳳灘馬伏波廟

逸權陵羣山捷疾如隕九甯知上水時寸寸彎
黃間三灘貫西溪首尾互回環蛟龍不敢窟下
有青苔綴巖巖伏波宮甲冑儼躬環功名出堅
壯既沒扞災患冥冥雲物晦肅肅神鴉還敬爲
神絃詞醜酒侑哀彈

泊礪石

誰言洞庭廣水涸川爲陸斷岸帶荒陂曲港連
窮瀆黃蘆已凋瘁芡芡叢新綠天寒澤雉雖行
人霜外宿夜靜月當船地迴霄張幄不眠誰與
共鳴榔漁父肅卽此矢弗緩未必非邁軸

台州城外過楊明經隱居同至釣魚山尋南宋

舊城

詰日訪茅茨緩游忘日旰陰谿冰未釋陽谷鶯
初轉登頓路盤紆緣沿水回轉厓憑三面削江
合雙流縮基局猶仿佛世祀嗟陵緬強弩拒堙
登神淵拯汲斷甑毳竟輿尸東南紆席捲至今
攻守地形勢若在眼綠苔汎曲汎白雲冒曾巘
賞心雖寂寞獲與朋知展聊爲永日娛激灑清
尊滿

忠山

此首刻本刪

江程無近遠弭權陵風渚一徑出蒿萊千山藏
霧雨寺門不知處但聞鈴鐸語

六月五日晚泊南洲廳

扁舟浮夏水鼎澧皆湖陂王事自有程迤邐尋

津涯崩沙隳楮岸聳樹隱青圻百丈直如弦出
沒何參差蕩槳駕洪濤收帆避曾颺遠隄見燈
火鼓角聲正悲甯辭行邁勞恐爲館人嗤

永順府

溪州有萬山山城大如盤客從何處來四面但
曾巘瘴雲晨惹袂茵露宵濡幘惡灘沂澎湃危
涂凌蹇嶮

世宗纘歷服威稜愴荒遠永順

獨先歸稽顙奉圖版昔爲虎豹叢今是桑麻畝
熙熙百年內終能馴獷悍余忝使者輶歲月嗟
已晚山行備登頓水涉勞牽挽庶幾似王褒歌
詩被絃管

北行

北行氣早嚴十月水流澌拖舟過淤口層冰帶

岸陲傲裝猶夙昔望舒再盈虧歲寒鳴鷓日夜
永偃參旗仁望清河津巾車曩在茲良辰弋鳧
雁暨汝翱翔時華顏偕物落壯節並年衰逝欲
返臯橋賃廡同栖遲旅懷不可遣喟然傷別離
除夕感膠州灣近事寄于華峯同年

滔滔新歲逼兀兀煩憂增憫憫思鄉里悚悚畏
侵陵初爲巢燕幕終如突豕繒債軍甘佚獲辱
國託抗稜絜犬寧牽尾驅羊但麾肱未計餘皇
徙已見螯弧登吹噓憑毒虺窟穴恣妖騰海陬
襟島嶼上相翦榛芳挈瓶吾不守胠篋彼何能
逡巡邦域割合沓責言興星星猶火燎汨汨逾
川崩畫地苞汶濟鑿山逼鄒滕藿食憂方劇芻
言戇或矜攀天叫閭闔踟地瞻觚棊壯士皆應

裂僉人口尚騰肥瘠殊秦越清濁判淄澠不鑿
前車覆焉論後患懲橫流已滄海馴至矧堅冰
逝將稅歸鞅卜築偕良朋春晚程符秀雨霽清
源澄采山有苓其木療疾無瘕瘕冥鴻安得弋寒
蛟庶可嘗知君開徑俟良夜共挑燈

登白雲山

逶迤前山路獨上西南峯天垂碧海暗日隱金
雲重自與安期別無人識短筇

觀音山朱鼎甫前輩寓齋

城隅山更僻梵閣共攀登斷虹飲白澗飛雨灑
金繩誰言驄馬客林臥似禪僧

登鐵塔

層城久填淤萃堵尚千仞憑高送落日雲沙無

遠近洪河盪胸臆壯士蟠餘恨百年帝王都俛
仰纔一瞬金源踵天水崎嶇分正閩淪胥固天
意盜賊安足論當年百萬家魚鱉忽充牣可憐
凋瘵後屏藩猶重鎮居中綰四方豈必塗嶽峻
鑿輿方西狩塞上無音問翹首望京華曷以抒
憂憤

秋夕感懷

林居悵秋夕慘慄氣初交暗露懸蛛網疏星映
鳥巢

楸梧寒竦竦瓜瓠晚翻翻小圃無人過虫鳴秋
草根

今夕復何夕月出衣霑露祇有紡軋苔復照螢
光度

龍洞

岱宗逾百里餘勢猶峻嶒洞穴閔幽巖靈怪昔
所憑水涸移蟠蟄路遠紆攀登小溪流瀾瀾峻
壁削棱棱新霜林葉稀薄暝嵐陰蒸霍如春華
敷粲若朝赧升烟巒互映蔚縟采歛乘陵升階
叩蘭若入室訪禪僧栖真離幻妄祛垢滯清澄
曷用攄奇懷物色待良朋

徐菊人北江舊廬圖

有池不更穿有亭不改築脩脩竹連牆翳翳桑
覆屋昔吾有先正此地留遺蹟文傳天下口往
往追潘陸朝野正歡娛名儒秉鈞軸當時陋巷
中輜駟接柴轂俯仰閱百年世變亦何速君來
營居止窅然若穹谷讀書無與共風蟬吟喬木

嗚乎治與亂循環劇輪輻凌夷先學問濡染爲
風俗六藝已弁髦新奇娛耳目卷圖三歎息吾
其知自勗

壬子後余與呂戒庵過從最久臥病旬日未通
音耗病愈訪之戒庵已盡室東歸愴然有作不
必寄戒庵也

世亂道益窮獨立寡朋儕閒居無所適邂逅造
君棲朝游連袂出車馬避氛埃夕爲炳燭飲言
笑恣嘲詼豈謂兼旬別蹤迹遽分乖叩門問主
人吠犬忽厓柴室邇君則遠疑是還疑非踟躕
陋巷中悲風爲我來聚散亦何常顧影留餘悽
安得屏憂患返稅翳蒿萊
春禊日偕同人汎北海

良辰偕勝侶弭櫂澄湖陰曾宮帶良陬喘嶮苞
青岑時暄卉木榮地古煙霞深臺沼今猶昔想
象翠華臨舟鮫施網罟芻蕘益不禁感物增切
怛孰云延賞心石潭俯澄泓苔磴緣嶇嶽聿余
衰病久登頓匪所任古人亦有言哀樂迭相尋
回船仍載酒返照顏前林

賈來臣至兗州偕登少陵臺有作

岱南有名都汶泗相縈帶高臺屢登踐四野平
無外夙昔誦君詩邂逅茲游最古人不可作憂
時到吾輩禹貢畫九州表海青徐大槩槩股肱
郡舟車南北會豺狼恣搏噬江淮已橫潰蔽扞
在得人神形勢安足賴君苞匡濟略士論稱著蔡
負手晚其傍曷以措崩壞且爲良夜飲百憂償

一快

過吳六處士邨居

旅行常早發旭日露未晞晚樹猶葱蒨宿鳥始
翻飛言從負耒人共叩林中扉主人慕高尚歲
莫臥牛衣雞豚閒自放水木寒相依邨墟漢舊
縣仿佛辨郊圻鬱鬱灌莽叢曠曠散朝暉野性
耽荒僻日盱瞻忘歸且盡流連意濁酒慰調饑
飲賈來臣園中

城南百頃陂緩游心獨愜折葦颭疏花病柳搖
殘葉長堤何偃蹇洲回港重疊澤腹凍未堅游
魚冰下啜其上爲高臺暝色千里接西行循階
岸原隰如衣褶賈侯遲我至掃除開別業繚垣
翼萬瓦棖題森岌業門有看竹人室無織蒲妾

大瓢傾美釀糟床新榨壓初筵荐河鯉香橙茱
鱗鬣杯深翹酒遲新月生樓堞緬思板蕩初厝
火然眉睫粲粲青衿子挺刃追荆聶盜賊歟憑
陵寰區皆震懾三靈將改卜宰相猶嚚囁君侯
濟世才大川需剡楫胡爲跽閭里萬卷恣漁獵
腐儒徒攘袂猛士方擐甲攬鏡對酖顏霜髭猶
可鑷

過天津追憶前總督陳筱石同年事寄以詩
析津爲甸服水陸東南衝闐闐塞通衢奔車日
璀璨運期窮百六亂起如莽蜂王官不敢詰倉
卒鉞交胸疊疊陳尚書禦亂獨從容國門咫尺
地屹立儼崇墉進效匪躬節退躡行遯蹤守官
繼渙忍饗祿恣貪庸至今逢掖士歎息後凋松

緬思發難初亦有陸與馮陂陀五步血效死寧
非忠俯仰悲存沒掩袂獨龍鍾

蓼園詩鈔卷第一

蓼園詩鈔卷第二

膠縣柯劭忞撰

無錫廉 泉編

七言古

紡車

紡車挂壁蛛網絲機摧軸裂不可治自余挈汝
來京師一朝棄汝忽如遺十年奔走天一涯入
門告別歸無期不聞紡績聞歎咨皆淚熒熒獨
汝知長安索米常苦飢豈知薄命邁百罹飛蓬
不櫛困蓐茲紡輒生苔廢麻棄絡緯秋啼聲正
悲俯仰今昔垂漣瀾空房無人夢見之當窗軋
軋心然疑嗚乎丈夫耕田婦人織哺啜糟糠可
頭白悔我常爲萬里客

伯希祭酒股疾問以詩

昔君攜我游三泉遂踰洵水登盤山懸厓斗下
徑路絕不知卻立雲霄間同游倦臥君獨往搗
血濺襪棕鞋殷東臨勃碣嫌地隘幡然徑上軍
都關餐苜跨衛氣彌厲出塞入塞窮躋攀尋山
尚欲賈餘勇豈料曳杖行蹒跚人生窮達各有
適世所不靳天仍慳寢谿枕壑不汝遂而况四
海憂痼瘵知君不羨宗少文自有傑句開心顏
夢游尚覺神骨躑病起甯愁腰脚頑郎山三十
六石筍神仙洞府君所寰杪秋登踐有成約他
日從君聯轡環

贈郭二丈立言

昔我避地程符東寄食異縣如轉蓬干戈偏仄

有曠土腰鎌隴畝甥舅同先生借我一畝宮許
我弱冠爲終童平津墓上鬪野蕨商歌躑躅游
相從此時海內亂無象唐突鯨鯢橫九壤殿上
垂簾堯舜出闔外專征方召往搗戈躍馬取卿
相歛翁風雲劇反掌書生萬事落人後况棄鋤
犁嬰世網嗚乎往事難具陳眼中聚散俄十春
東逾滅貊西洮岷溟溟萬里天爲津飢來驅我
何逡逡得如一只羽失百鈞欲養不逮稱鮮民還
鄉又訪山中鄰枯桑葉盡風飈急破屋巘岼狐
兔入篋裏藏書有鼠穿井中乳雀無人汲先生
六十猶堂堂爲我刈楚炊黃梁從容問我游何
方如今四海波不揚男耕女織詠太康無田可
耕事亦常曷不歸來守故鄉尚憶當年絃誦地

聽秋館裏夜聯牀

高南阜西邨烟雨圖

先生卜宅城西邨疎林野屋今尚存當年圖畫
落吾手展卷仿佛知衡門清川逶迤帶修陌杏
花一片開紅白恰是清明上冢時細雨斜風遲
來客先高祖荆王府君與先生至契吾家遺事
每上冢至邨外先生輒早候之人能傳如今宰木凌風烟城中已換舊閭井此
圖况在乾隆前有田可耕書可讀銷聲鏜迹庸
非福翰墨流傳妬盛名風塵奔走耽微祿我欲
東歸海上城料量薄產學躬耕他時策蹇城西
路試向先生畫裏行

寄孫佩南

憶昔受學來金泉卜居近住清溪邊驪龍水底

濯文錦濡爲細縷何宛延方流圓折各有象雲
縈美藻相新鮮自嗟頑鈍衆所異推迹北應知
無緣擔書躡屨走萬里巢痕一掃非當年先生
宰縣治異等哀憫鰥寡推豪姦相公睽賜御史
劾獨有吾黨稱君賢竭來書院授都講榮光一
綫浮淪漣關西夫子應詔出區區動色占三鱣
豈如沒齒誦周孔欲攀伏鄭論後先商量舊學
他日事新詩徑付鄉人傳

寄劉子秀孝廉宋晉之太史

先君抱道不偶俗卜居塵市如穹谷營營時輩
相逐逐不識人間有藹軸誰如二子信道篤每
造精廬留信宿經疑史難紛詰鞠攻以善問無
堅木小子隅坐侍炳燭辨析精微不敢瀆粗知

黃稗非種種自我辭家西入蜀冰遼瘴粵窮川
陸十年奔走干微祿欲養不逮天何酷憂患相
仍車轉轂歲月歛如鳥過目東平才子亦碌碌
健筆能扛鼎百斛卞和屢獻遭刖足初篋廬中
兩叢竹晉之書齋雪節霜根穿破屋家無儋石書滿
簾何時返稅西山麓墾土誅茅同卜築所愧遺
書不能讀甘爲農圃營樵牧東風捲地春草綠
海上鯨鯢猶未戮鄉心日逐南飛鵠
高翰生臨桂未谷先生說文統系圖

六經掇拾秦燔餘萌芽古學河平初建武重開
登衛賈遺文祕籍窮爬梳召陵祭酒最晚出思
導衆水從尾閭十四萬言詰訓在陋儒穿鑿俱
芟除顏推江式傳授絕而况後世非完書吾邱

學古學張有陽冰改屨垂兩徐作者七人歷千
祀推以統系誰敢居邇來文字變日甚竟禘倉
頤尊佉盧君摹此本有深意尋源要溯昆崙墟
金壇不作安邱祖堂堂法宋埋黃壚可憐同志
益零落杜門我尚箋蟲魚

姚少師爲徐中山王畫山水卷廉南湖屬題

懸厓斗俯馮夷居洪濤汗漫春天墟崇山峻嶺
相縈紆巖敷上隸挂羲和車員爲簞笠方爲壺石
戴崔嵬土戴岵中垂綫縷蟠危途攀援欲上愁
蝮狙荒唐古木枝條疏松枌楓柏檀槐樗桃枝
竹箭兼篠簜鬻茅誰蓋林中廬有隱淪客與之
俱或仰而觀俯而趨或傑然立若枯株或如老
聃據竈觚又學禦寇憑槁梧衣冠古樸鬚眉麤

綺園用里真吾徒衍師畫筆乃其餘胸蟠奇氣
要發舒倪黃避席口爲吐漸僧學步差次且興
朝佐命中山徐狡兔旣死憂韓盧豈若不爲將
相爲樵漁衍師畫此有意無寧知尺蠖倏龍據
袈裟已著仍簪裾六王勛烈旂常書發蹤指示
豈不如獨恨帷幄之謀佐革除羽翼篡奪忘其
初先生拊手應軒渠

寄王子丹

巴陵之北湖山奧葉令辭官昔高蹈摧矜折銳
百不爲黃庭內景擘精妙夜鶴回翔禮斗壇晴
虹嬰葦燒丹竈山深無人谿路澁仿佛文狸從
赤豹昨款松關留信宿壑谷風生吟萬竅前山
落月與雲齊獨倚霜簷展清眺君言麋鹿心性

野不願爲犧荐宗廟賤子迷方豈足論先生絕
俗安能到吾之友曰蓋使君學道早學邱真人
童顏不老有仙骨至今吏網櫻其身何時共入
華陽洞采藥名山訪隱淪

寄蓋鳳西

蓋侯習靜能治劇川東川西名籍籍簿書堆裏
誦黃庭百里奸偷匿蹤跡會上峨眉看佛光平
生事業俱能詳栖真養素無松羨讞枉亭疑有
趙張我欲從君乞靈藥憂患拔纏苦難卻君言
至寶出磨礪石猛沙麤渠不惡祇今解綬還里
閭兵戈阻絕無尺書山中雪滿黃精少白髮初
生待君掃

送陳蓉曙南歸

黃霾四塞白日闇捲屋猶騰如頓撼經時不蹋
海王村陋巷車聲來坎坎我才君才兩樗櫟蹤
跡雖疏氣相感更爲窮愁嗜我詩正似芹菹與
昌歆幡然告別不敢留君先我去能無憾廣文
先生古君子獨立東南碩且儼羨汝寧親萬里
歸采服趨庭朋盍哉島夷構釁難未已猛士東
征虓虎闕金繒款敵我已愚壇坫要盟渠更焚
九連城外交傳烽况逾淚水收王險尚方請劍
言雖戇漆室倚柱心愈懣祗知骭髀負微軀縱
忤權強非勇敢吠藍戢怒已曛黑雪急凌競雲
黯黪竈薪濕濕爆春雷窗紙晶晶沍冰鱗留君
共覆掌中杯當筵請作漁陽摻
王鈍夫以元人重摹蘇文忠公零泉記拓本見

寄賦詩謝之

先生昔往零泉零至誠所感靈澤濡山中父老
導隼旟飲泉而甘芼嘉蔬懷我風愛慰喁喁流
傳翰墨乃其餘零泉片石今則無重摹遺迹猶
龍攄君藏拓本惠寄余摩挲百徧忘飢劬飢生
嗜古搜粉榆倚撫瓦礫遺明珠雕鐫莫惜碑材
麤筆精墨妙留型模三時有害民嗟吁神聽雖
聰吏終窳先生美政永不渝勿令野火燒榛蕪
尋碑他日逾維邾

秦權拓本爲寶沈庵題

秦皇治書日有程臣斯刻畫爲權衡古籀繁文
宜變更森森劍戟嚴而勅力政吞周務兼并因
時立法誠堅明積重之弊後反輕蝟毛亂作由

編氓一人懸重天下平嗟汝所學非荀卿
仇十洲仿宋人漢光武渡滹沱圖

欲雪未雪雲凍凝旌竿掣頓風棱棱流澌驟合
成堅冰十騎五騎行登登前騎返顧後語磨後
騎蹴滑蹶復興車乘雜還兼徒丞裁逾深涉旋
解凌節旄拂地垂三層畫輜伏鹿馬鈞膺馬毛
瑟縮人凌兢真王之氣猶龍騰仇英工筆世所
稱臨摹名蹟誇尤能權以濟衆事則應白魚之
瑞甯妄徵蕪蕪豆粥嗟可矜北道主人吾股肱
遂降十郡夷苗曾摧凶刻暴莫敢承聖公否德
天所憎有真人出收分崩網羅英俊在得朋讖
記妖誣吾不憑撫今思昔感可勝濡染凍墨挑
寒燈

哀城南

此首哀楊井鳴鏡劉光第

黃塵蕭蕭暗白日右翼總兵嚴隊出道傍觀者
不敢問逮捕城南事倉卒考詞未竟獄已決陂
陀西市流冤血名澆身毀竟誰論眼前十鼠埋
同穴哀哀寡婦哭向天數諫不用絕可憐平日
能知陶荅子今朝肯見孔熙先讀書萬卷真何
益臺閣聲名俱第一孔翠文章銜采毛蚍蜉性
命投甘炙回首城南落日昏招魂無路入修門
茫茫禍福誰能料羨汝青山獨往人

後哀城南

此為五山作五山漢姓楊

西安門裏酒醋坊楊家第宅臨康莊連葦累棟
鬱相望文皮藉地錦衣牆蹋筵歌舞羅名倡百
僚上壽爭趨蹌兩宮恩禮逾尋常出入禁掖連

兩侍郎謂許景澄贈元○王則徐樞
密用儀也

貂璫禍機猝發誰能量柴車西市真搶攘侃侃
廷爭袁太常從署牘者兩侍郎老臣無罪尤昂
藏白頭飲刃可憐傷象齒焚身兆厚亡竟與謗
諤同罹殃秦人不用哀三良危身奉上名俱彰
石龜爲豫錫之都統作

吾聞爾雅有十龜使君所得尤瑰奇元黃妙合
孕靈氣神物變化非形爲昔負九疇昇文命山
川始奠分崇卑三江納錫不肯入遠浮涇渭來
西陲長山大谷恣窟穴余且有網無由施 冲
皇受命踐大寶翦剔醜類臣羌夷四靈馴擾聖
所瑞欲薦九廟登軒墀泥沙汨沒報自售頑質
未蛻遭羈縻有麤而角車子獲觀者歎息爭愕
貽氈包席裹亦何有虎豹夜夜夔樊籬朝燔夕

烙神鬼泣發書易之君能知濯以清泉帶文藻
青花之瓮官窰磁百夫昇曳度隴坂望氣直欲
先旌麾竭來投劾返初服寶視詎數餘泉蚺右
倪者若左倪類不俟鑽灼能稽疑使君悟道契
真宰乾坤造化窺端倪心虛腹實存牡籥瞑坐
不用繩牀支至人息踵意有踵塊然罔覺真吾
師大隱何妨住朝市上壽豈止儕期頤白雲英
英蔽窗牖定知砌下生靈著

車遙遙送敬孺長兄

車遙遙如蓬捲心遙遙如輪轉車有兩輪恨不
方行人莫恨關山長

車遙遙如雲行行萬里轍有程山長水遠俱能
越莫恨車輪恨車轍

丹邱雙鈎墨竹爲宗人輔周作

竹本無朱甯有墨筆法端倪在鈎勒誰言仿佛
柳誠懸丞相中郎共標格籜龍鱗鱗有雲孫文
采風流今尚存畫筆休稱鐵連瑣要看雪節與
霜根

贈謝叔璠

郊原麥熟天南風新蠶作繭桑椹紅稻田戽水
沒牛腹隴上旅穀猶芄芄城南城北登頓熟扁
舟更獵菰蒲叢亂松回合塹阜遠一水曲折津
梁通百餘年來行殿圯但有壞壁穿薶蟲蕭條
鬻舍人跡絕宮祠提領將無同近聞教士尚新
法欲以巧智開羣蒙嗟予老矣忝都講始信耳
目真盲聾朝廷側席仁賢俊豈納讒說登驩工

改常易古昔所歎擅更百度何匆匆腐儒饜祿
無寸補自屏田野甘衰庸長林決驟羨麋鹿短
簑獨速隨兒童使君政事富閒暇登山臨水聊
相從三時不害五種稔但願擊壤歌年豐

宋徽宗畫鷹爲方柳橋題

徽宗畫鷹昔未窺潮州太守今得之青駁白鼻
天下知紛紛贗本不敢訾豈知真贗別神骨工
意工似無差池臣京再拜跋卷尾聖學天縱非
人爲君臣騁智自矜伐此事亦足爲著龜昔余
來往松花江遺聞得自乾隆時都統掘濠獲錦
篋中有一幅鷲鳥姿欸云天會十三載不題名
氏知爲誰或疑地是五國城徽宗北狩羈於茲
山河破碎不愛惜區區瘞此嗟何癡油汗煤染

勿瀟滌慘澹如帶前朝悲

成都阿文成公祠

高宗神武燁旁魄翦滅強梁朝萬國紫光閣上
第一人采入金川名赫赫臨機料敵兼忠智萬
里歸來獻俘馘英雄嘆喑聽指蹤權倖恣且畏
顏色天彭井絡昔所臨崇祠轡轡成都陌百餘
年中事反復猾夷狙伺通琛帛曲突之謀適不
用爛額焦頭俱上客邇來國是誰敢搖宰相依
違能塞責披雲激電想公來後生願問平邊策
釣魚城行

釣魚城乃在涪水濱元兵三十萬不及李夫人
夫人有兩兄南朝王統制蒙古李平章統制問
夫人答言妾姓王願作將軍妹恩義甚非常時

嘉定應是寶祐二誤

系宗史理宗紀雷是守合州者

王堅也堅卒於理宗時不應臨安

破後尚存此詩蓋述蜀中舊聞

與正史不同

合州降元事見按按廣中書云

李忠宣公以狀時降將乃王也

在嘉定未蒙哥寇東川統制守合州苦戰二二三
年人言涪水絕城內汲神淵何以示北軍魄之
鯉魚重兼斤爾可烹魚飲美酒十年按甲吾能
守砲風中人如中矢釣魚城下蒙哥死遺命得
合州雞犬慎勿留可憐一城人魚在釜中游臨
安已歎宋已平獨有合州不解兵夫人謂統制
妾本李家女有兄在成都呼來能救汝朝封一
紙書暮製一雙履持書復得履平章悲且喜奉
詔至今合州降者皆免死統制不受官仍除招撫
使至今合州人能言合州事前有冉家兩兄弟
後有夫人奇女子

大渡河行

朝辭縈經縣晚渡大渡河涼山西來雲峨峨細

路曲折如旋螺憶昔駱相公生禽猛噬張天羅
河伯聽焉呵爲我鞭蛟鼉萬賊欲憑陵倏忽沒
盤渦前行不得前卻行畏猘羅相公告猘羅譬
之率烏汝爲囹并力翦此賊汝亦完巢窠猘羅
給賊入有似投燭蛾連岩四塞飛走絕下有礪
崖轉石萬仞之洪波垂頭就繼巧一命坐弋不
復煩矰弩乃知帷幪之謀制萬里發蹤指示無
差譌吾聞金陵賊此虜尤僂羅長揖張忠武君
尚不用如吾何自渡金沙江氣已無岷嶓出人
不意計亦狡寧知相公七十猶番番或言思鄉
士夜半歌楚歌遂令十萬賊紛紛籍籍皆投戈
又有良家女婉孌兩青娥甘心同日死瀝血矢
靡他萬言不許貸剖戮翦剔醜類兼么麼吾聞

諸葛丞相張益州古之遺愛今不磨相公戡蜀
亂先後寧殊科蠻夷受約束敷政寬不苛功成
雖在險勿乃得人和君不見劉侯俘賊功第一
錫之鞶帶終三枕

爲劉健之題蜀石經拓本

唐家運圯九州裂百年霸氣西南歇後孟前王
同一轍廣政君臣愈孱劣蜉蝣楚楚爲容閱右
古崇文計尤末禮堂寫書付劖劖蜀大字本先
閩越十經刊石表圭臬不遺傳注裨經說閩位
告終事旋輟補刻終嫌筆畫拙一日同歸刮灰
爇拓本猶堪證淮別廬江尚書來秉鉞公子才
名夙彰徹千金購買蒐遺闕四百餘紙森羅列
竹垞堇浦應歎絕後進登來軼前哲熹平分書

懸日月鴻都門外車填咽炎祚陵夷火尋滅開
成思繼貞觀烈覆盆宰相薤冤血而况偽邦憑
盜竊文字安能救机謀嗟余好古宜捫舌

劍門雨後黃瀑布最奇記以詩

劍門厓隙雙嵯峨霾雲泄雨漫兜羅縹絲須黃
不須白天孫濯手昆崙河大劍小劍青相磨劍
截不斷垂滂沱蜀人但詫錦江錦寧知神仙拋
擲黃絲純天台匡廬邊幅窄懸流僅擬天紳拖
豈若裁量端匹表十里剉槩以染同白科題詩
更憶湘綺老黃絹幼婦今如何

吳三桂偽玉璽拓本

文曰勅命之寶

潢池盜弄明祚移守關之將來乞師申包存楚
非所期開門已豎迎降旂狐埋狐搯竟倒施寇

仇故國恣芟夷異王冊命恩不訾耿尚勛舊肩
相差貴極富溢人所慕而况悖逆爲梟鴟白頭
作賊信可嗤晚竊帝號聊娛嬉衡湘蹊蹕力已
疲倖貸齊斧仍輿尸豎立凶孽強扶持終焉一
炬靡遺蠻荒無地埋枯骸五華山麓臨滇池
瀦宮柝棘留餘基築牆掘土衆愕眙登玉璽一
光陸離歷年三百無人知投棄瓦礫填荒陂當
年捧出登軒墀蓋署僞命狂傲豺狼謹噪兼
狐狸嗚乎西南之產媿美珣玕琪汚於盜賊寧
非俱篆文雖僭勿磨治留爲鑒戒垂來茲

紅人菁

宣武城南吾敝廬荒園數畝埋榛蕪新霜一夜
能染濡中庭徧插紅珊瑚卻疑海水今年枯干

樹百樹森扶疏王愷石崇寒乞奴眼中纔見六
七株不須更到獅子國也應笑殺波斯胡天公
播弄有意無龍宮寶藏肯畀余新炊更有丹砂
飯不是麻姑拋擲餘

李莘夫山中讀書寄以詩

讀書何所似政似訪名山游山何所似又似涉
獵萬卷開襟顏况有山中人非樵非隱非神仙
插架之書屹如四立壁君乃栖遲偃仰於其間
韓家嶺上月未落琅琅夜半書聲作山魃竊聽
舌舐齶也羨先生讀書樂先生政事天下聞當
官不受尚書嗔南浮瘴海一萬里廉州父老稱
其循入山不深林不密他時恐爲蒼生出經史
紛綸歲月閒文章跌宕烟赧逸奸人造作誑羣

愚塗飾耳目能須臾改常易古可歎吁李夫子
相汝豈是山中癯障川要挽狂瀾倒不負生平
所讀書

徐榕生以郎山詩見示題其後

郎山三十六石筍昔與王孫賦招隱鯁生一誤
登踐期回首榮枯感朝菌道屏縣裏十日留尋
山雖遠看山近西逾淒易願未償馬首塵埃徒
袞袞誰如徐侯健且敏凌厲風雲馭高隼鳥翅
參差劍杪尖一卷新詩盡苞攬平生笑殺劉靜
修枉費雕鏤苦肝腎天下何曾有仿佛馬耳雙
尖堪一哂哲兄膽力亦堅剛十年竟負芒屨捆
豈獨山靈笑頑懦萬事無成坐濡忍何當共讀
惠連詩酒釀茶香澆渴吻

戚武毅刀爲王廉生祭酒作

將軍昔住東海濱海中精怪光有煩歎濤欲浪
厥首墳魚龍騰掉不敢羣占以火攻利用焚誰
其畀余滄海君腰絙而泐召水軍鐵錨曳出逾
千斤豐隆扇炭歆浮雲鐵絲髻手來并汾鍛之
淬之殫厥勤魚皮之鞞纏牛筋南征島夷北戎
獯一搗勅敵腰領分事奇語詭蒐前聞事出青藤紀聞
君得其一世所厯涼堂置酒衆未醺與酣露柏
當高旻禁中頗牧天下聞逝欲從君返鄉粉劔
剛凶妖孽稜氛豈無猛士育與賁看汝先登攝
頭幘持以殺賊追往勛

伯希游小五台歸示紀游詩八首以長句題之
廣昌之路通飛狐長山大谷峻且紆篋輿挽上

七十里五台湧出蓮花跌山中八月白草枯昨
日單衫今複襦有泉不凍醜兩渠金源鐵板可
搨摹暝投山寺依毘盧星斗忽與平時殊纖蘿
不動萬籟息空氣浩浩長鯨吐北渡桑乾歷軍
都階梯上下猶坦途出塞入塞十日餘探懷示
我千驪珠吁嗟先生絕世無天潢貴胄人楷模
高名奕奕擅八區數進忠規據讜謨扶持正直
排奸諛宜登帝廷贊都俞寧知愛作山澤癯鯨
鯢跋浪稽討誅宰相非人四海痛君不必爲屈
左徒吾亦不爲折檻朱邇來白髮墮滿梳壺中
有藥能掃除騰身且與盧敖俱朝晞博桑暮柳
穀蓬萊清淺水可逾馭風騎氣非舟輿我當擁
篲爲前驅

延子澄來蜨軒

昔年僦宅王恭廠喬木荒原劇森爽仙人亦愛
草元廬飛去飛來集書幌鼎新革故運中興萬
事推遷感不勝太常修禮應無地學士論交尚
有朋城東巷子車箱狹藥欄花塢相周匝主人
飲酒誰同醉日日開軒醉仙蜨長安二月春事
妍祇有仙蜨如當年遼東一鶴歸華表洛下雙
鵝起道邊來蜨軒中纂蜨史自古忠臣原不死
君不見膠西亦有匡侍郎搜羅故實書盈箱

為羅叔言題攻吳夫差鑿拓本

器出咸陽縣當是楚得於越秦

滅楚又遷於秦

勾吳伯業狐庸開兵車轍迹日北來晉好初修
越難作麋鹿終上姑蘇臺復仇未雪醉李恥占

夢已告章明災天與不取自貽患長頸烏喙非
雄才十年生聚獲一逞為虺弗顧虵寧摧錦衣
戰士氣凌厲電掃勅敵如崩隕范金製器紀功
烈寧為栖甲湔塵埃區區戰勝自矜伐蠻夷得
志良可哈基局未固國旋圯世次譌舛疇能推
名從主人雖不易重器遷徙遺民哀羸顛芋蹶
又相踵渚宮草沒阿房灰豈知神物有呵護田
夫竟發千年薶君藏拓本最精好片紙價抵英
瓊瑰赤堇之銅若耶錫乃辟乃灌皆良材大刑
小刑世罕覩湛盧軼事尤奇恢吉金鑄鑿不鑄
劍風胡歐冶應徘徊請君裝池此本壓歸權定
見前胥後種濤頭回

郭湘帆聽松草堂

聽松堂前風謾謾捲作秋濤能撼屋門閒徑僻
無三伏連牆薜荔緣階竹誰與主人共幽獨垂
綏飲露鳴蛩宿良夜開軒螢照讀時來松下同
碁局鹿皮翁住符山麓主人問誰今二陸君家
平原氣如龍十年讀書草堂中先生見我比終
童昆刀出匣截蛟鴻棠梨夜雨春山空我亦惟
悴如轉蓬桑條貫牛馬受籠豈若北窗聽松風
卜和不用泣龍鍾

高翰生金泉校書圖

尚書丁公昔開府經始金泉翦榛莽姚江傳習
有淵源濟濟諸生列堂廡吹竽縱說齊客濫甄
拔終能十得五三二十年來日凌替場屋時文矜
紉組朝廷揀弊議更張記誦陳言棄如土掃除

鬻舍爲書局學津揭厲非無補丹鉛讎訂要得
人彘彘束帛盛平聲筐篋先生博綜藝文略文章

仿佛晁公武卷帙紛綸甄百家鼎彝珉駁尊三

古區區撰集何足論史謬經譌辨魚魯淹中耆
舊旋凋喪海上龜鼉正蟠互先生早賦歸去來
自葺蓬茅蔽風雨園林著述承平事昔年賓館
今無主我亦金泉問字人地老天荒尚羈旅勸
君不用寫丹青且抱遺經守環堵

徐鼎霖省長爲其尊人追繪山居課子圖屬作

詩

松花江濱長白麓考槃碩人詠藹軸一經教授
笑桓家不爲通經爲干祿山中宰木已龍菴仗
節還鄉畫錦同蒿蔚餘生誰似我歸號松柏夢

秋風

匡鶴泉侍郎畫竹

侍郎法書見已罕畫筆森森攢密竿興來濡墨
無深淺桂箭桃枝紛滿眼論詩早契張詩於奪
換詩格爲丹青邱山零落三十載濟南尚有篔

簞亭

先生主講金泉懸篔簞亭額之

文宗側

席求賢日侍郎倬直登樞密幾餘揮翰賜近臣
布葉分枝用丹筆庚申之變那可論鴝鵒夜嘯
東華門陟方不返蒼梧狩但餘竹上之淚斑斑
痕金泉書院留賓客曾見先朝御畫冊寧知白
髮老門生篋內珍藏鐵鈎勒雪節霜根出歲寒
筆端儻遇籜龍蟠可憐一代君臣契留作金泉
遺事看

戴海珊墓廬讀書圖

昔我扁舟出三峽盛山屢訪仙真栖風亭月岫
俱勝絕回厓沓障窮攀躋卅年往事劇彈指夢
寐尚到夔門西君家精舍傍先隴千章喬木使
徑迷江山蟠鬱氣象古而我不獲游相攜長安
城中冠蓋藪獨君與我甘塵泥論交但恨握手
晚時入環堵塞蓬藜邇來士論益縱誕訕侮忠
孝騰狂詆天心未厭禍亂臚會見裨海橫鯨鯢
羨君至性儷曾閔蓼莪久廢仍餘悽一官脫屣
不返顧精研六藝誰與齊誓墓早學王會稽夜
離經史朝扶犁請假此圖爲息壤訪君他日逾
彭溪

劉梓謙建南行役圖

叩竦之險天下無雲梯石棧盤空紆王蛇歎電
如椀孟毒霧熏人僵路隅大渡河深不可逾縱
橫黑水交灌輸厓傾路滑併兩跌行人招手雲
中呼回視九折猶坦途裸羅鼓弩腰胡盧虎豹
甘人豎毛須井邑牢落榛芳蕪道傍狼籍血與
膚遂繞禺同至邛都西南衆水瀦爲湖父老之
言怪又迂魚頭戢戢皆人顛鯁生萬里身羈孤
冒歷險澁僕馬瘖回頭往事隙過駒夢到黎雅
心瞿瞿何人舐筆調鉛朱蠻煙瘴雨能染濡翦
燈逆旅忘飢劬壯哉劉侯我不如越雋西連打
箭鑪苞以衛藏如周陟猾夷逼處粹可虞先幾
之事慎衣裯山川險易隨時殊他年負羽纓曼
胡請君爲作從軍圖

嘉祥縣

九十九峯龜曳尾左倪右倪俱相似中有一龜
蟠不起首戴城垣履塵市俯飲南旺湖中水十
室之邑君勿鄙寶書負出天畀似洪範九疇文
在此錫以嘉名告千祀

葉煥彬麗樓藏書圖

昔余持節來衡湘訪舊再登君子堂元鈔宋槧
恣評量十五萬卷森琳瑯湘潭袁氏巴陵方葉
家書城與頡頏石林以後稱文莊津逮後學源
流長有賢子孫企前良聚書能讀兼能藏覃孳
經史爲文章旁搜百家筴批糠虞初小說窮荒
唐百川歸海流湯湯聿余學步踣且僵思殫疑
問病未遑十年一別經滄桑摻袪京輦心惋傷

聞君卜築菱洲傍危樓百尺凌空蒼左揖嶽麓
蟠崇岡七十二峯岌相望右吞百頃陂汪汪名
曰麗樓達四窗珍函祕籍排千箱中有隙地支
繩床朝吟夕諷聲硯硯校仇細字分丹黃運窮
百六遭搶攘尉羅不及能高翔莽蜂毒螫真豪
芒元龍意氣終揚揚殿門著述古所臧老於枕
蔗乃吾鄉展卷題詩意慨慷吁嗟乎秦燔之後
書再亡此樓應作魯靈光

圈魚

松花江上古扶餘獻人歲貢秦王魚腹甲如龍
竟受剗乾餘之骨充苞苴登筵不數鱸與膾晶
瑩照碗如車渠賤子東游北沃沮使君邀我來
觀獻朔風棱棱九月初冰澌未合寒沙淤長網

截江網目麤百夫力拽謹且呼潛龍移穴鼉鼉
俱勢欲簸蕩陽侯居身橫九畝獲喬如尋常所
得猶專車受人牽鼻翻紆徐區區自護無乃愚
連江柅木爲周陞蹭蹬泥沙蹙不舒一涔之水
徒相濡垂頭折尾甘執拘象齒焚身可歎吁羹
才第一羞庖廚不爲骨鯁爲甘腴波濤一失咫
尺殊蕭樊縲繼韓彭殖出入弗慎遭網罟看汝
萬里行頭顱

徐梧生宅看牡丹

徐家牡丹羸百株紛綸大朵如盃盃孟胡紅趙紫
顏色好花當葉對莊而姝都人歲宴崇效寺士
女絡繹城南隅祇園盛麗亦何有十朵五朵真
區區南皮相國老詩伯重來仿佛游玄都聲名

煒燁賓客衆俯仰今昔猶長吁豈知陵谷一朝
變城郭不異風景殊香車寶馬昔來翫流落道
路儕亡逋徐侯且倒花前壺看花得似前年無
繁華未必勝蕉萃明朝風雨知何如

青檀寺

青檀寺裏青檀古石上盤根無寸土崖崩石裂
根能補旁穿孔洞相撐拄上拂崑巖蔽雲雨抱
石爲癭突爲乳絙樹鬚鬚垂綫縷輪困不才無
比數窮俱殫醜翻媚嫵或瘦而偃聳而僂籛條
戚施能仰俯龍頭菌蠢豕腹臞熊彪顧眄誇腰
脅蟠蛇結虺蚺怒鬚鬚亂髮山獠舞詭形殊
狀憾未睹連谿塞壑森盤互盛夏颼颼冬雪沍
我來停車日傍午貪奇嗜怪窮深阻雙崖回合

如塹堵架構巉岳作堂廡神淵瀆淪涌階礎帝
命青虬爲洞府不教野火燒林莽木魅山妖敢
陵侮拳曲擁腫逃斤斧自全其天聖所與杞梓
榘枘自荆楚毋過雷門持布鼓

嚴紹光西湖雅集圖

西湖在貴州臬使署

古來圖畫難俱述誰似符頭孤列勿

譚言鏡中撮影

鑒物能留物十有三家皆閣筆先生七十猶矍
鑠勝日開筵賓秩秩一談一笑一拍浮寫影空
明見毛髮紅藕初看瑞萼開紫泉又報榮光出
甘瓜磊磊實如駢老柳疏疏絲似櫛洞房五架
穿窳篠飛閣三層凌突兀管絃入夜轉淒清風
露迎秋已蕭瑟稻田垂穎稍畏旱使君勤雨占
箕畢置酒將無往事同尋碑還惜蒼苔沒

康熙中撫

軍謙客於此明圖中賓客盡豪翰獨有鯁生慚
曰大雨有碑記

薄劣珍藏篋笥壓歸舟定卜滄江虹貫月

爲李一山題黃小松所藏唐搨武梁祠畫像
訪碑寰宇窮漁獵眼底何曾見唐搨黃家舊物
傳彌甥寶氣英光出灰劫蝦蟇蝕月賸內壤十
有四冊遺三葉六丁下取不敢收欲縱鬱攸氣
還懾唐家父子始藏奔上蓋提督官印押國初
諸老益標榜後先跋尾紛稠疊賞奇析祕有淵
源道咸上與乾嘉接就中詞翰誰第一老猿筆
力尤趨捷先生昔爲運河倅嗜好平生在甌蠟
武梁石室旣再完此本宜歸此老篋五十年來
陵谷變歲月纔如煮羊胛九經文字尚芟除何
况區區說碑帖寧知老臥紫雲山魯國諸生猶

漢臘李侯好古能敏求五世縑緜纂前業楚弓
楚得豈天意喜色津津溢眉睫昔余采訪逾東
瀛片石居然珍什襲過門柯篋圖隱逸踏階搏
奕表義俠奸人媚外寧足誅席裏甌包佐詔脅
勸君局鑰慎守寶解若穿窬莫嚙躡壁書幸免
秦煨燼趙壁終歸藺懷挾題詩更欲踐嘉招淥
灑清尊快一呷

徐梧生鵲山寒食圖

人生莫作遼東鶴滿目蕭條舊城郭敝廬蝨臥
如荒村有客攜圖來叩門主人略識圖中意鵲
山寒食年年事誰將涕淚濺鶯花頓覺湖山風
景異君不見元裕之泰和尚及承平時汴州大
去蔡州滅濟南客是南冠羈吳兒洲渚等閒好

先生別有傷心詩又不見徐矩庵畫師爲汝圖
晴嵐十年游宦返鄉井大隄楊柳仍穆穆眼中
陵谷已遷改青鞋布襪霜髭髯振衣日觀峯濯
足東海水不如問舍求田歸故里躬耕何必耕
酈亭卜居何必居臨鬻嗟君四十九寒食閱水
成川非夙昔蘆殿衣冠未寂寥清明日君奉
命奠德宗皇帝
梓宮於石門霜露還蕭瑟大河滔滔竹箭流濟
南雲樹連章邱登山臨水可以消煩憂安得年
年寒食節與君同作鵲山游

爲周養安題其尊太夫人篝燈教子圖

子欲養親不待此事誰能填恨海周侯敷歷二
十載麻衣血淚痕猶在吾聞周侯文學絕世無
九苞之鳳翔天衢獨恨不爲返哺烏母也慈兒

也孤荒江老屋城西隅家徒四壁無斗儲母也
停機授兒書兒能勤學母忘劬一穗油燈青閃
閃尋思往事肝腸斷他日蟠胸書萬卷金章紫
綬纍纍縮不及膝下孤兒心婉孌君不見機聲
燈影洪家樓百年圖畫今尚留誰其繼者紹興
周兩家節母賢相儔而我蒿蔚餘生已白頭口
談忠孝空悠悠展卷題詩涕泗流寒窗夜雨風
颼颼

蓼園詩鈔卷第二

蓼園詩鈔卷第二

膠縣柯劭忞撰

無錫廉 泉編

五言律

對月

飛光升碧海流影下遙天
烏鵲驚猶起勞人應未眠
徘徊清漢外演漾綺窗前
別有高樓婦盈盈正撫絃

真源寺遇文二丈端甫

野寺將迎少停車憩午陰
蟬聲高柳合龍氣綠潭深
邂逅紆官事栖遲悅道林
蘇門興不淺鸞鳳儻遺音

鹿邑道中

朔吹晚逾勁嚴冬覺路長雪雲輕重白沙日淺
深黃貫酒高辛里尋碑下瀨鄉當年裘馬客逆
旅認清狂

遂平城外送孫佩南

客路衣裘薄朔風吹不禁寒雲帶堯野雪意滿
中林沙鳥清淮晚山程鄭阮深知君拔蓋望俯

仰獨沾衿

君有季弟之喪

寄景縵史

見說張公子親遊百兩齊梁園三尺雪春水過
金堤旭日雍雍雁明星喔喔雞知君偕老計早
築百泉西

早行

雪路下成皋川平覺望遙晨霞燒似火宿霧捲

如潮轆凍車聲遠衝寒馬意驕田家應早起燈
影閃團焦

西平縣裴晉公祠

裴相屯兵地行祠亦壯哉水從洄曲合道自郾
城來天子元和聖涼公大將才淮西問遺事寥
落不堪哀

訪劉惠卿金泉精舍

淹臥避人事衝泥問汝歸水雲檻外暝螢火雨
中微短榻侵書帙閒門接釣磯授時無許郭誰
與論鈐機

劉子秀書齋

愛汝精廬好寺門盡日關孤村連積雪衆木秀
寒山客有尋碑至僧餘乞米還三冬文史業撥

置儻能閑

故吏部侍郎膠州匡公輓詩

昔者木蘭狩公爲扈從臣未傳玉几命曾挽翠
旂巡隱忍求紓國艱難敢乞身永貞前日事淒
水義誰陳

諸生問禮樂一老臥邱園浩蕩江湖興蕭條揭
厲恩故鄉膠水涘哀挽歷城門尚有遺書在文
章孰討論

寄梧生

我念子徐子林居無世情一官真做屣萬卷盡
名城點勘淹中禮周旋稷下生買鄰知有地待
汝卜臨鬻
曉發正定府

巖城樹色分滹水帶沄沄曉月連霜沒寒鐘殷
地聞北行窮朔易西上歷并汾獨有虺隤馬臨
歧戀舊羣

井陘

險絕井陘路峯巖自昔聞星辰疑倒入土石劃
中分寂寞陳餘壘悲涼廣武君寧知千載後嶺

上祀將軍

白面將軍祠相傳
爲趙時死敵者

彭山舟中作

瘴霧曉淒淒高林春喚啼雨添棕纜重水擁竿
橋低夜爨舟中火晨耕壟上泥生涯差底拙不
用歎栖栖

石門驛

龕燈照無睡信宿石門關夜雨尋孤枕鄉愁惹

亂山崎嶇憎夢噩流宕覺身閑不用窺明鏡松

喬儻駐顏

與蓋鳳西論攝生之術

越雋道中

連山莽無極百里入哀牢寥落人烟斷參差虎
跡高涼關巖壁壘邛海壯波濤遠向旄牛徼吾
生何太勞

清溪縣

險絕清溪路征輶方北來長河互黎雅小縣贅
邛邛擁樹山艸立揚桴候吏回危途幸安穩試
醉客中杯

嘉定府試院小亭子為南皮張中丞造有水木

張孝達

之勝記以詩

使者登臨地嘉州尚有亭推窗江雨白覆檻海

棕青標榜經綸業用三國名臣贊淵源著作庭諸生傳
軼事篝火到岩扃

予美寄郭蓉汀

予美碧雲端高樓生夜寒星疏榆歷歷月隱桂
團團歎息姮娥寡悲涼織女單無由問青鳥竟
夕倚闌干

凌雲寺

凌雲天下寺展眺亦雄哉水合三江去山蟠五
岬來佛城紆勝迹却燼弔遺灰歷歷元明事憑
高首重回

西厓釋迦象經始海通師舟楫波濤失蛟龍窟
穴移佛財人可得吾願世寧知江水自今古遺
踪欲待誰

涼山

獵獵戍旗風涼山列格重蠻江蟠大竿瘴雨暗
邪龍斷木求三丈清醪獻一鍾永懷西部事徵
外正傳烽

同顧復初錢王廉生卽席作

帳飲江亭外移尊稍放船夕陽楓柏寺秋水蟹
螺田杖履陪真率湖山愜靜便自慙留落意分
袂獨潛然

泊歸州

揚舲下巫峽登艫已秭歸月上女媧廟荒城聞
搗衣山寒猿狖靜夜永霜露霏誰言家萬里井
白夢依依
梅花

新繁龍藏寺昔款雪堂師丈室叢花外閉門春
雨時寒香撩入定妙悟發臨池雪師善行草自與東
湖別何由寄一枝

敬事堂前樹細苞帶雪看牂柯袁太守爲我拂
冰紈凌亂分叢密高疏寫影寒空餘圖畫在掩
袂淚沈瀾

山海關

前朝鎖鑰重遼薊此雄關地窄填滄海城欹倚
斷山如何百戰將不見隻輪還感慨興亡事時
清徵卒閑
風雲接沛上郡縣畫遼東不用四夷守應知萬
國同野花開輦路叢樹鎖行宮欲獻時巡頌生
涯尚轉蓬

松山

昔者

文皇帝長圍塹海隅秉旄麾勇決豐

鼓釋纍俘灌木疑兵勢平沙想陣圖士猶齊六

伐王本用三驅

聖主威棱遠降臣禮數殊

松山隆碣在駐馬獨躊躇

烏拉街

塞垣聚落少望驛稅擅車雪路兵譏酒春江吏

案魚交鄰猶事葛防水已亡徐故國邱墟盡寧

論天造初

永平道中寄王石隲

客路侵初霽悵然感昔經暮雲臨碣黑春草入

關青益部留王奐遼東問管甯縣知歸計遠短

鬢莫星星

耶律文正王祠

昔在完顏季真人起朔方威能加四海約未定

三章暨暨宗臣畫隆隆大業昌遺民還衽席嗣

服已苞桑伯仲身俱隕君臣義敢忘材原儲晉

用兆已卜金亡梵宇三間屋明裡一瓣香舊墟

披馬鬣新賽降蛇祥

有蛇出神座下

嗚咽高粱水蕭條

曳刺莊九京人可作歎息慕周行

送胡壽山之吉林兼寄吳清卿太常

萬里吉林州巖程畏滯留雪中孤障沒冰下大

江流計吏圈魚貢軍書置大郵尚餘滕屨在浩

蕩憶前游

北門委寇準西事用韓琦借問當關將何如十

萬師賓筵侵曉析候館拂春旂回首松江上音

書空後期

通州八里橋

路轉危橋北林皋彌望分嶺雲齊樹白野日帶
沙曛故壘餘兵氣荒陂散馬羣休論鳴藪恥七
萃昔能軍

夜坐朱子祠簡丁少山

林塘新雨定落宿耿涼天露氣成幃幄流螢到
几筵開軒娛遙夜倚枕聽鳴泉卻憶西齋客高
吟應未眠

簡徐菊人同年

積雪滿中園寒林暖欲昏蒼晴烏啄瓦巷晚客
敲門甌為生塵漑書因伐蠹翻莫嫌疏懶甚開
徑佇高軒

傅衡堂園居

步履訪茅茨幽尋藉自怡夕陽明雪屋寒鳥定
風枝穎秀嫌書拙盃空慙酒遲力田詢泥賈更
欲到臨淄

送子秀

莫惜醉顏酡臨觴感慨多單車衝雨雪十月渡
滹沱逆旅如相問書生近若何飯牛似甯戚不
欲疾商歌

新城書院寄九弟

書院事多暇郊行暄日遲初黃沙際柳舊綠雪
中葵興滅臨觴覺年侵攬帶知春耕已在眼待
汝共耘耔

蘆溝早發和伯希作

翳翳膏燈燼樽前良夜徂不眠聽櫪馬送客起
城烏流落從漁父經過憶酒壚蘆溝橋上月得
似昔年無

新城道中寄梧生

野飯日高春淒淒零露濃蟲聲田有穉秋色圃
餘菘已覺寒衣窄仍愁病馬慵郎山三百里羨
汝躡雲峯

伯希游百花山歸贈以詩

言從釋道林百里訪雲岑野寺磨廡入寒溪松
檜陰采山春尚早聽雨夜初深羨爾耽幽事栖
栖感我心

炳燭上厓屨僧檀對臥時窗虛雲氣重林密雨
聲遲野鶴晨聽梵山船夜問詩勝游思一往更

卜杪秋期

寄敬孺長兄登州書院

亂山行不盡直到郡西門地窄人烟少天寒海
氣昏齋廚下鳥雀巷路入郊原更念春衣薄朝
來勸一樽

三哀詩

左忠壯公寶貴

見說平奴潰降人早漏師逋上空壁壘盪決裹
瘡痍援絕心猶諒城孤氣不衰向來激切疏祇
欲聖人知

鄧壯節公世昌

水徙餘皇去風纏廣柳悲臣應徇官守事已動
蠻夷組練無顏色蛟龍亦涕洟可憐債軍將地

下漫相期

壯愍公永山

誓奪巖城返寧辭間道危埋輪誠烈士持戟本
孤兒雪沒縣兵地星沈蹶將時人傳艸河渡深
夜見旌麾

送安小峯前輩

君得罪後西人以
重金購石疏稿

昔年胡忠簡抗論紹興初四裔知名字千金購
諫書先生真不忝世事竟何如感慨都門別猶
多長者車

師友俱遺直堂堂獬豸冠犯顏臣語戇貸死聖
恩寬海國兵戈滿邊城雨雪寒縣知青鬢改子
細鏡中看
九日宴珠江即席有作

炳燭成高宴寒江轉寂寥酒香傾近坐海氣逼
中宵雪糝茱萸鬢春回芍藥腰中年哀樂意拚
付雨瀟瀟

薄裕軒觀音山後書齋

結構應無地尋山路欲迷古城萋薛荔陰澗釣
虹蜺刻燭詩先就傳觴客屢攜安期還俟汝邂
逅問丹梯

黃浦送朱鼎甫前輩

遠送難爲別還登江上樓亂山天破碎滄海地
沈浮直道應三黜餘生但百憂嶺南多放士羨
汝臥滄洲

寄宋晉之

十載不相見生涯亦可傷著書連病榻飲酒避

歡場學弊人寧信才迂命亦妨更饒兒女慟洒
淚徧初篁

邠州

二月寒猶壯邠郊雨雪時雞翹春草短雉雊凍
雷遲歎息旄邱葛悲涼漆室葵如聞鉤黨獄宰
相賜槃菴
簡管士修

祇園清曠地邂逅稅乘驄高鳥青天外深花綠
樹中移家居畏壘扈蹕上空同儻返屠羊肆栖
遲待汝同

晚郊卽事

片雲回驟雨衣上溼斜陽紫閣嵐陰重青郊麥
氣涼尋涂趨梵刹問渡上漁航壁壘催巖角寧

知野興長

昆明池

不信山河改昆明尚有池胡僧認灰劫織女象
機絲渺渺前朝事熒熒宿麥陂石鯨今在否輸
與牧童知

寄杜仲丹

去帆兼雨重來岸極天低訪舊登蒲首移家問
灤西道消師友盡世亂死生迷昔日滄洲客朱
顏已改鰲

聞段西圃北歸寄以詩

及到巴陵縣書遲君已回平湖帶青草細雨正
黃梅變革憂多術艱難愧不才無由問京輦北
望獨傷哀

簡朱純卿太守

館驛切巖隈清溪繚復回邨閒門臥犢稻穫水生苔漸老知農事爲邦羨吏才登臨風日好五馬儻能來

白魚圻

架屋屢屨項維舟溟濤隅亂帆爭曲港一塔卓平湖愷悌神應勞艱難道益孤金釵當牲醴肯說昔人誣

常德寄門人閻鎮珩明經

鼎州如鼎腹梵閣獨凌空澤國魚千畝霜天雁一叢罽毳幕窄堵挂雕弓尚有論文暇湖西訪釣筒

郴州道中

百丈直如弦拖舟欲到天人烟帶郴水鳥路上騎田社鼓斜陽外春城麥秀邊勞生知未已一棹任沿緣

澧州阻雨

鼓角報嚴更還疑解纜行春秋同旅雁風雨滯江城炳燭看魚上回船覺浪生歸期知不遠樽酒若爲醒

泊零子口

川平檣似櫛岸遠樹如苔塞雁猶南遷征帆已北來泥頭開甕酒蠟瓣綴盆梅自有栖遲興鄉心莫更催

頤和園值日道過張秀才書齋呈管士一祭酒輦路籠高柳舟車並岸行亂蟬風際斷疏雨日

邊晴枕簟能消暑茶瓜况析醒知君耽野趣館陳
吏莫將迎

會稽王子貽其尊人為鄞縣學官母病子貽乞
以身代自沈於鄞縣之月湖母病竟愈此同治
二年事也哲兄子獻屬作詩

會稽王孝子遺事至今存不用賤河伯真宜從
屈原世人多不諒此義敢輕論援筆思為誅寒
燈夜雨昏

蒿蔚餘生在如何折殞此人遙知一坏土應傍月
湖濱野日迷紅棘春風泛綠蘋經過鄞縣路為
爾一沾巾

耆壽民侍郎見山樓

昔在承平日中朝啓侍門王官猶市井夫子獨

邱園敷歷才名久栖遲晚計存滿樓山色好挹
取到清尊

東光縣董子祠

汎濫疑無地荒祠水壅門行人猶下馬野老獨
窺園命世材難用傳經道豈尊公羊今屏黜災

日本雜詩

異莫輕論
科大學士張之洞奏建經
屏公羊傳不用

少年輕萬里垂老尚乘槎汗漫寧相待溲溟似
可涯夜燈江館雨晨帆海門霞覽鏡悲身世羞
看兩鬢華

別國輶軒使中朝侍從臣一身成遠客連夜夢
慈親渺渺鄉書斷萋萋隴樹春程符山下路回
首憶樵薪

危檣試一臨，沓浪際層陰。縹渺神仙事，蒼茫國士心。人從徐市老，海爲魯連深。一掬書生淚，安能洒古今。

斗轉海中灣，長崎互亂山。人烟浮溟滓，鳥路上海顏。乘槎唐藍在，卓錫漢使還。送楊星使東歸枇杷新入市，帶雨正斑斕。

海上傷心地，要盟在馬關。外舅吳擘甫先生題馬關旅館曰傷心之地徒聞收旅順，已見割台灣。敵愾終虛矯，輸平益懦孱。老成憂國淚，地下尚餘潛。

何處看花好，櫻岡萬樹櫻。蒸霞初綻萼，颺雪旋霏英。疇昔觀圖畫，題詩附姓名。一般誇眼福，也到魯餛生。曩爲曹竹銘題櫻花圖有句曰一般眼福誰能料未見花如未讀書

勝絕華嚴瀑，尋源直到顛。瀦爲千頃澤，洒作百

重泉俯聽崩，雷殷平看泄。雨懸誰言瀛海客，重過劍門前。

春陰江戶重，林薄晝霏霏。野屋如簷笠，山田似衲衣。鏟崖分麥壟，疊步屬漁磯。父老還惆悵，人從戰後稀。

元兵羸十萬，蹈死亦堪哀。未報青虬出，猶傳白雁來。山蟠三島立，潮汨九洲回。更欲游前筑，元壁壘猶存觀滄醉一杯。

勝概推江戶，當年幕府開。山頭常戴雪，海上不聞雷。闐闐燈爲市，園林繡作堆。可憐歌舞地，尚有刳餘灰。

黔中秋日書懷四十韻
不作栖遲計，還爲浩蕩游。挂帆歸海上，攬轡到

蠻陬薄宦寧多暇勞生汔未休風埃方瀕洞簿
領亦優游地僻曾來鶴身閑欲狎鷗高齋陵灌
莽曲檻俯長流徑壘莓苔剝牆垂薜荔凋斑皮
苞穉筍翠帶曳文楸墨瀋紅絲研茶香白定甌
支離聊養疾晡晚獨登樓野闢町疇狹山圍俾
倪周一關分柱浦衆水匯旁溝泄雨泐泐暗蒸
嵐浥浥浮紛虹侵晚出漲霧待晴收近訪陽明
洞攀躋石磴幽頻過丞相廟徒倚澗松樛老我
無家客生涯不繫舟吹竽齊士濫獻策魯生餽
業向成均問書從史館離登衢思騁力報主切
分憂葵藿心寧改桑榆願莫酬迂疏招詬諍婞
直集愆尤抗疏紆宸眷移官忝使輶馳驅將萬
里契闊劇三秋異俗兼荒梗危途信阻修瘴雲

昏似墨萬露膩如油夜枕江聲惡晨征虎迹稠
郵程經犵狁譯語辨嘲啁耆舊咸同接淵源莫
鄭留安能陶後進祇覺愧前脩倚伏誠難料張
弛敢自由草萊雖墾闢戶牖奈綢繆士論歸調
鼎王綱拯贅旒荆舒才自僻趙孟語先偷掾吏
尋梅福江湖訪魏牟朋交真落落身世益悠悠
利涉何須筮還丹不易求程符邱壠遠昨夜夢

濰州

過鎮遠謝秀山太守招游南山卽席作

江蟠危石底路蔽亂雲間地險關逾壯時清吏
自閑登樓春雨霽掃洞古苔斑卻立欽巖外天
梯信可攀

貴陽署中作簡吳梅孫 遺興

地僻愛晴曦初陽歲獻時疏黃垂梓帶嫩碧展

蕉旗老懶思鄉切迂疏報政遲北軒松韻發待

汝共栖遲洪北江詩更喜開北軒寥寥發

過河道口故居遂登畿輔先哲祠高閣即事有

作

舊識城西路行行轉覺遙沙平蕘斷碣林缺補

危譙鄰里猶相問雲山况見招闌干頻往復未

覺市塵囂

丁巡卿總督輓詞

吏治能安靜當官有幾人先朝知悃愾新政効

因循稠疊仍恩遇蹉跎奈病身猶思傾蓋晚東

閣夜留賓

敦迫來京輦垂垂兩鬢皤楊彪辭未允王式悔

如何朔雪無鴻雁嵩雲有薛蘿空餘丹旆返薤

露咽悲歌

即事

遠浦依依柳含稊綠尚微九門新雨霽十刹早

春歸漸覺披裘重縣知櫛髮稀山河終未改不

用惜芳菲

姚邨早發

山下十餘音當年亥冬香九山東國德時作

秋潦欲迷津停車夜向晨雞聲風滿野馬首月

低人用世終迂闊勞生但苦辛誰言周道改洙

泗尚斷斷

金鄉道中

十里金鄉縣逶迤傍舊河勞人霜鬢早澤國鹵

田多小邑知藏廩巖城見植戈桑榆思就暖世

亂竟如何

野望

溪回陂壠斷野望轉依依互水橋爲帶苞村樹
作衣杪冬寒日短久客故人稀腹痛思前約高

墳草已腓

謂陳梅村閣學

蒙山

嘉祥縣城內簡飴山侍御

望遠能無興偏增歲莫悲山城初動角野寺共
尋碑雪蔽牛羊路天橫雁鷺陂衰遲能自遣終
負故人期

謁曲阜聖廟

兵戈拏未解下馬問祠官言訪金絲壁苔痕上
井榦廟中猶禮器身上負儒冠返稅知何日重
來拜杏壇

子貢手植楷樹

築室問何地森森宰木繁枯槎終不死元氣至
今存言語無枝葉文章有本原永懷千載後此
意與誰論

寄徐梧生

近得江南信龍蛇劇鬪爭青衿尚佻達白甲已
縱橫雪沒將軍壘風搖使者旌縣知兵事亟議
論待荀卿

虎據龍蟠地真能一戰收星辰天北極江漢水
東流國是誠難料生涯不自謀豈無廉藺將慷
慨賦同仇

歷歷

歷歷三年事何人裂紀綱韜鈴登將略簞篋失

官常竈下餘雞犬山中縱虎狼可憐簫管咽猶
自弔梁王 此謂宣統初親貴用事也

憶昨

憶昨龍飛日名儒在大廷人才勞汲引學術費
調停變法無千古徵文有六經空餘佻達習城
闕子衿青 此刺張文襄

歎息

歎息成都亂星星燎九州徒勞言惻怛不俟計
綢繆奪業籠商賈興戎長寇仇恨無王御史請
劍似朱旂 此刺鐵路國有之召氣也

昔者

昔者曾丞相戈船募習流從來天作塹不似壘
藏舟鵝鸛能爲陣熊羆或作裘逡巡俱倒戟遺

恨滿江州

哀長江水所

漢家

漢家開幕府二十六將軍借問千金笑何如一
戰勦北城鐘已動西邸酒初醺吏士誠勞苦中
樞日奏聞

資江

資江流不盡灑淚到資州已返三軍旆猶行萬
里頭觚棱歸夢斷囊韞赴車收尚憶留賓日鍾
山訪舊游 哀端忠敬

垂簾

垂簾聽政日抗疏切憂危出入 先朝命升
沈國士知堯封音遏闕周廟鼎遷移咫尺青蒲
近雲天洒涕洟

賈來臣邀集單父臺賦呈三十韻

賈侯敬愛客勝地足盤桓澤國持龍節林居訪
 鷗冠兵戈連解鞚身世入憑欄遠岸曾冰合長
 郊積雪寬昔賢真卓犖遺蹟尚嶺岍大雅同時
 聚高名異代看不辭杯斝盡已送涕洟瀾僕邀
 材終短馳驅歲又閑江淮纏沴氣鄂郢肇兵端
 未塞長河決仍延曲突燔奸雄方晚鼎部曲盡
 登壇宿望期平勃陰謀挾羿寒含沙憑蜮射起
 陸見蛇蟠逼脅遷鐘虞交通奉敦槃九重猶駘
 疏萬事益辛酸力薄慙橫草名虛謂伐檀椎心
 遭板蕩側目受抨彈北望雲橫闕東征雪沒鞍
 雙旌巡葛繹一棹渡鉤盤畢景林中稅侵星竈
 下餐征衣塵未浣薦牘墨初乾比德人如玉同

心臭是蘭相逢雖哀哀惜別更惓惓夙昔承嘉

惠周旋締古歡匠門收杞梓文囿集鸛鸞敦近

黃墟早憂生素鬢殘斯人寧落度吾道正艱難

利涉須舟楫高飛待羽翰無緣酬造化祇愧總

師干早起東山臥蒼生望謝安

瀛臺

四面浸淪漣層宮獨翼然滄波猶太液白日竟

虞淵控鶴回鑿地鳴雞問寢年玉階霜露重秋

草自芊絲

團城

地傍觚稜近城連蟪蛄低白波秋森森錦樹晚

萋萋佛現莊嚴相天留紉縵題百憂真可遣拚

付醉如泥

民國初遷佛象於
居仁堂後又遷之

北海

朱樓兼白塔林際帶參差欲訪瓊華島還經太
液池音達櫂猶縈藻荇網已盡鯤鯨逝音達水前朝事沙
鷗汝豈知

佛寺

不盡登臨意言從象外游青燐瑤殿暝紅葉石
潭秋梵宇通三界神山傍十洲周廬巡徹地返
棹莫淹留

王鈐山京寓書齋

昔年相送地雪路出臨城及爾同憂患勞人問
死生橫窗秋樹影隱几午蟬聲近得經過便商
量下濮耕
園中雜詩

卜居雖近市蓬藿掩衡門潢潦真成港田廬祇
似村蚓泥封曲徑蝸篆繚頽垣莫擬愁霖唱林
端看早暝

老圃經年別無人薙草萊蒲桃垂漣乳松子起
樓臺地迸新抽筍門扃舊活苔祇應籬下菊不
似早年開

蕭疏紅蓼晚灌葦亦垂英自有江湖意况兼風
雨聲磯頭垂釣近岸際放船行老我沅湘客能
無萬里情

泐泐連日雨悶倚竈觚看避漏移書幌衝泥豎
藥欄溼螢黏牖上飢雀啞簷端滿酌休辭醉無

衣畏早寒

綠穗垂纖草黃花捲落槐夕陽初入戶秋潦欲

平階擾擾嫌封蟻區區笑井蛙世情愚不識獨
愛晚晴佳

林臥已經旬蕭閒病後身晴簷蟲罨網午牖鳥
窺人井涸淘寒豨廚空曬溼薪農書搜汎賈真
欲作齊民

插籬周圍外引筧過庭中雨後澆菘本霜前剝
栗蓬熒熒蕎麥雪獵獵櫟林風寄語酈亭客生
涯若箇同簡徐梧生

不羨陶朱富園官報有秋籬金瓜五色饌玉薤
千頭豆粥甘如酪松醪濁似油主人能展待開
徑俟羊求

歲暮無慘感傷存沒作懷人詩四首
昔上延英殿同為侍從臣無由攀懶尾尚憶犯

鳳老前寄初稿略字句略有異同又
第四首全異附注行間

龍鱗雨雪山中晚風濤海上春咸池終浴日不
用淚霑巾劉幼雲

老作東瀛客無人記姓名衣冠非夙昔風義自
平生學已攀三古書還擁百城名山藏著作未
克覺一身輕羅叔言

歷歷三千事都歸一卷詩秦廷方指鹿江渚莫
然犀管邴君無忝唐虞我已知文章零落盡此

意不磷淄王靜
遊世從邱馬相期在嵩論交堪白首遊世竟
歸魂雨漏藏書篋霜蕪種菜園寢門猶未慟東

望海雲昏郭蓉汀
晚過新民屯飲王進士書齋興音刻本州

塞路夕漫漫人家傍古闌馬毛蒸雪濕虎眼射

星寒邂逅逢投轄，栖遲羨挂冠。勿辭良夜飲，昔別在長安。

爲丁黻臣題召穆公太保鼎搨本

涖政分西陝，疏封啓北燕。甘棠嘉蔭在，喬木世臣賢。撥亂中興運，揚休大雅篇。無疆承歷服，有命俾旬宣。濟美宜繩祖，明禋乃格先。旂常勛煒燁，圭白賜連翩。懿彼同州鼎，黻臣官同州知府應陳歷

室筵考文兼，籀古制器備。方圓虎豹猗，猶攫蛟龍鬱。律纏神工窮，範冶巧匠失。雕鏤昔者宗，周隕終教胤。子全老臣心，獨苦故國祚。長延欲證汾王事，還疑攝政年。廟中彝器重，搨墨莫輕傳。

蓼園詩鈔卷第三

蓼園詩鈔卷第四

膠縣柯劭忞撰

無錫廉 泉編

七言律

七夕抵蒲州府偕韓二州登驛館亭子

小驛軒亭修竹間，主人留客共躋攀。鈞簾七夕初弦月，隱几中條一桁山。簿領侵尋君未晚，風埃瀕洞我應閒。明朝采藥王官谷，莫放青厓白鹿還。

成都

石郭金城倚斷霞，成都地望最三巴。劉璋自放山中虎，馬援休嗤井底蛙。漠漠人烟市橋水，蕭蕭春雨惠陵花。英雄豈必論成敗，不數王家與

孟家

登樓

不上高樓已損神，昨宵夢見若為真。
離愁碧海蟾蜍晚，別路蒼山杜宇春。
軋軋機絲清漏永，沈沈燭影翠眉顰。
天涯蹤跡休相憶，二月東風陌上塵。

舟中望佛圖關簡楊福孫

巴縣東南一都會，葱葱鬱鬱氣佳哉。
萬瓦參差切山上，雙江回合抱城來。
當年地脈何曾鑿，異日關門卻自開。
篆刻羞稱姚彥士，佛圖觀察有知君。
獨擅勒銘才。

孫水關

孫水關臨孫水涯，白沙孫水即浩浩似金沙。
巴

飲調入猿聲，苦邛竹烟籠鳥道斜。
獵獵溪風蠻洞火，荒荒塞日戍樓笳。
西來萬里甘留滯，更爲寒衣恐憶家。

送楊福孫

我念恆農楊伯起，臨歧握手倍依依。
故鄉已是三年別，之子今從萬里歸。
蜀道羣山尖似劍，巴州衆水疊如衣。
山行水涉同留滯，他日相攜願恐違。

泊峽口寄宋晉之

北風蕪蕪搖船旌，虎牙桀豎寒崢嶸。
天高明月當峽出，夜靜白雲從水生。
皋家有廡容羈旅，綸氏無田負耦耕。
夢裏相邀定相失，東方未顯霜猿驚。

宜都城外作

鄂岳東南向此分津
艚延佇倚微醺江流近東
荆門闕雪意遙低楚澤
雲海上鯨魚猶跋浪天
邊鴻雁已迷曠蓬心不
用慙菲薄歲暮相期有
使君謂鄉人李
子青觀察

金山寺

扁舟晚泊瓜州渡便訪三山興已豪斗覺天香
飄法雨如聞水劍泛腥濤青磷白骨縱橫散貝
塔珠樓突兀高差喜登危筋力健江天俯仰見
秋毫

高宗法駕昔東游水上黃龍負御舟百年遺老
垂垂盡萬里滄江淼淼流天回日月題銀榜地
轉河山駐彩旂尚有葱龍佳氣在掃除刳燼換

林邱

過廉南湖申江別業

峭帆迤邐拂軒楹欹枕前窗送櫓聲竟日壺觴
留客住滿川風雨看潮生著書豈爲文章事遯
世終羞市井名記得香山蕭寺晚共披梵夾爇
松明

玉真閣

城南閣子二百尺碧瓦瓊棖儼洞霄下界魚龍
偃潮汐中天山高載笙簫星辰不改三階正日
月常臨萬國六鄰對滄溟醉后酒還鄉準許伴
漁樵

郭湘帆同年招飲卽席作

柝靜重門街鼓遲初筵莫問夜何其人來峽東

江盤地歲入風饕雪虐時且拂征衣深勸酒更
燒官燭細論詩十年重憶追歡事草色西池定
問誰哲兄靖侯先生昔飲劭恣兄弟於此賦詩云西堂春草色已見入簾青

送孫六皆

十年流宕孫公子往事傷心那可論門前車馬
風塵色枕上詩書涕淚痕青苔雨漏三間屋白
草霜栖半畝園負耒躬耕他日約題書早問陸
平原

丙午過膠州故居作

枯榆無桤賸盤根猶帶當年劫燒痕江總還鄉
尋艸市陸機去國憶衡門春來乳雀巢堙井日
莫飢餓竄壞垣不用惛惛弔孤影淒涼往事得
重論

龍蛇慘淡歲三陰地入青徐殺氣深滄海東浮
雲似墨孤城北望火如林夜闌秉燭間關夢歲
莫登樓感慨心已斷根荻任蓬轉十年流宕到
如今

尚書昆弟遺民在

先忠卿府君名在東林復社為明大司馬夏卿從父兄弟

零落東林舊黨家避地初來滄海上移居更傍
墨溪涯百年故宅餘喬木十畝荒陂啁晚鴉記
得斷橋流水外父兄持我看蒹葭

周垣一帶繚逶迤廣廈修庭認故基插架圖書
同浩劫焚巢燕雀竟前知樵人已斧園中杏游
子還烹井上葵鄰里蕭條各何在山陽聞笛未
應悲

安陽城外作

羸馬荒陂意正慵
旌竿遠掣戍樓風
兩行官柳平沙外
一片孤城落日中
漳水東流懷往昔
銅臺北望弔英雄
十年不到趨庭地
又向三河問轉蓬

團山

團山廟子山之東
孤雲落日相童童
牛羊萬點雪路外
鴻雁一行沙海中
將軍銅柱分疆界
使者珠槃泣會同
山河尺寸慎愛惜
側身北望天無窮

觀音嶺和韓人金君平作

觀音嶺下稅羸驂
又向山僧借一龕
落日欲低嶺西北
鄉心已落海東南
斷蓬絳磧風聲急
古木攢雲雪意酣
袞袞相逢緣底事
要將身世問

瞿曇

書院秋雨兼旬排悶裁詩寄郭蓉汀

松花江上秋多雨
北雁銜蘆盡向南
隱几詩書寒女織
窺窗鳥雀病僧庵
縣知樂歲足供給
可憶清尊從笑譚
躡屩羸滕料歸事
便求十畝共桑蠶

送王惺齋

幕府栖遲鬢已斑
又從塞上使車還
白登雲起疑樓櫓
青冢風來想佩環
雁過西隄鄉信少
人耕北假戰場閒
知君不作登高賦
一障功名料遽慳

九日偕徐伯縉登昆盧閣

層城積霧曉陰陰
羸馬衝泥問梵林
十度重陽

九風兩百年身世幾登臨東浮峽口啼猿台北
上雲中斷雁深往事裁如吹一吹相看甯有去
來今

寄孫佩南

暮天霜緊雁來遲萬里秋風入鬢絲時事紛紜
遽如許故人流落竟何之芙蓉晚菊色常好絡
緯寒蟄心苦悲回首西園已陳迹祇應舊學不
磷緇

真定大佛寺閣子

又拂征衣謁梵宮羸驂小住亦匆匆寒雲翠堵
盤雕外斷岸滹沱落木中勝日登臨朋輩少悲
歌感槩古今同珠樓貝塔俱零落祇有當年聖
藻雄

寄李壽林

大明湖上昔追歡佇看青雲刷羽翰冀北馬空
思伯樂淮南木落感劉安狂來抵掌輕餘子老
去垂頭作冷官見說殿門詩境好藥欄花塢足

盤桓

紫泉行宮

邑人相傳高宗爲回妃建

城南城北無十里紫水環爲百頃陂春草萋迷
唐繡嶺白雲縹緲穆瑤池石船荇藻縈文榭鉤
砌莓苔臥斷碑秃袖弓衣親較射向人能說獵
圍時

滬上山東會館落成祀 至聖先師恭紀以詩

曙色初分明尚黎禮堂釋奠獲攀躋廟中如見
東家孔海外猶稱大國齊秩秩賓筵陳酒醴曠

曠旭日麗棖題尚書能譯侏離語泰西人觀禮
宇尚書曾到昆侖月竈西致頌詞呂鏡

三河道中寄崇文山前輩

蕭蕭榭葉送新涼緩步林皋稅筍將白雁南飛
霜信早馳龍東走塞雲長側聞新政頒條畫自
愧微官戀稻梁色樹莊前秋樹色先生別業在
三河色樹莊

幅巾一老獨徜徉

簡蔡崧甫

國子先生兩鬢絲十年留滯去何遲力田未必
常逢歲識字安能暫療飢雪路初晴湖上剝膏
燈欲燼夜深暮身閒地遠堪乘興不用相招灤
水陂

涿州王家店和伯希

涿易東西二百里君方東轍我西轅一城春雪
人煙溼雙塔夕陽鈴語喧霽霧初寒猶滉漾冰
澌暫解已奔渾筇杖畫裏尋常事野店還能共
一樽

從平谷至盤山宿僧寺

斗下縣厓卽梵宮振衣猶在最高峯虛窗象緯
闌三界短榻波濤枕萬松石棧天梯應仿佛氍
巾絲履且從容山僧已訂明朝約掛劍臺邊拄
短筇

和伯希寄王山人作

朔風獵獵吹寒晴曉來雨洗霜林賴平谷山如
陽馬出洶水船爲工蚓行已知樂歲無并鬲又
羨高人簡送迎三泉寺中吾定抗定汝千頭柿

代雙牛耕

書伯希四上舍生詩後

其一王御史廷相也

昔年巾卷知名子廩廩風裁迥出羣我向詩中
逢伯樂君從門下得朱雲三經取士頒新法六
館尊師肄舊聞早晚相攜恆嶽麓勒移不俟北

山文

寄徐梧生

種竹三年已出牆北窗偃臥晚風涼齋鹽無分
竟何似簿領有程殊未央抱葉新蟬兒誦澁投
林宿鳥婦機忙塵埃馬首終嫌劇不羨道屏近
故鄉

展舅氏李吉侯先生墓

孝子村西負郭田重攜麥醴奠新阡芄芄旅穀

春風裏寂寂行楸落日邊碧洛青嵩非故國素
車白馬憶當年外家遺事憑誰問淚洒南雲一

泫然

宿霍家坡

柱翦爲廬蔽壞垣主人留客已黃昏泥行百里
龍蛇窟野哭千家雨雪邨開歲定知農事晚伏
流猶怕水泉渾蠲租貸稅年年詔歎息今無鄭
監門

旅夜遣懷

屬鼻春寒析酒醒夜闌猶傍短燈檠十年留滯
長安客萬感悽涼畫角聲宰相薦賢終誤國書
生決勝尚論兵從今不信王夷甫努力中原亂
易平

此是甲午年作謂霜常熟用其門
人張謇策力主與倭戰也

贈李莘甫

我羨曹南李莘甫郎潛矯矯獨風棱九衢車馬
成氛霧萬卷圖書作友朋雲海蒼茫愁剡楫雪
窗寂寞憶挑燈知君不是耽奇古共闢荆榛訪
羽陵

偕梧生赴定興道中作簡伯希

策蹇相招有底忙瓜疇芋隴已新霜寒禽磔格
上喬木秋潦縱橫明夕陽欲向農家詢要術還
從學士輯集良方生涯不用饗微祿底事莊生晒
撮囊

過元達小園

滑滑街泥雪已晴兒童掃徑習將迎紅窗暖日
自春色元達新納姬人白石寒花非世情硯滴冰消鸚

眼活琴絃沙亂蟹行清飲河滿腹甯無分更爲
彈冠愧友生

詠史

莫向胡僧問劫灰旃檀一炬化烟埃城邊地裂
雙鵝出海上風多六鷁回左道黃巾成底事清
流白馬亦堪哀當年只有萇宏血濺作東華井
底苔末二句謂王文敏

昨夜欃槍彗紫宮九門投鑰劇匆匆銅駝陌上
聞傳角玉女窗前見倚弓野散周廬屯貫市天
回輦路出居庸傷心一掬昆明水落葉哀蟬恨
不窮

潼關北去走京華撮笠都人盡憶家秋色初辭
溫室樹春風又落上林花珠槃玉敦終修好旅

贈李莘甫

我羨曹南李莘甫郎潛矯矯獨風棱九衢車馬
成氛霧萬卷圖書作友朋雲海蒼茫愁剡楫雪
窗寂寞憶挑燈知君不是耽奇古共闢荆榛訪
羽陵

偕梧生赴定興道中作簡伯希

策蹇相招有底忙瓜疇芋隴已新霜寒禽磔格
上喬木秋潦縱橫明夕陽欲向農家詢要術還
從學士輯集良方生涯不用饗微祿底事莊生哂
撮囊

過元達小園

滑滑街泥雪已晴兒童掃徑習將迎紅窗暖日
自春色元達新納姪人白石寒花非世情硯滴冰消鸚

眼活琴絃沙亂蟹行清飲河滿腹甯無分更爲
彈冠愧友生

詠史

莫向胡僧問劫灰旃檀一炬化烟埃城邊地裂
雙鵝出海上海多六鷁回左道黃巾成底事清
流白馬亦堪哀當年只有萇宏血濺作東華井
底苔末二句謂王文敏

昨夜欃槍彗紫宮九門投鑰劇匆匆銅駝陌上
聞傳角玉女窗前見倚弓野散周廬屯貫市天
回輦路出居庸傷心一掬昆明水落葉哀蟬恨
不窮

潼關北去走京華撮笠都人盡憶家秋色初辭
溫室樹春風又落上林花珠槃玉敦終修好旅

矢彤弓已拜嘉老病儒生揮涕淚不隨戰士化
蟲沙

抵陝州聞

車駕西幸已至長安

迤邐山城帶迴樓紅旗捲雪朔風道地分二陝
桃林隘水迸三門竹箭流望氣應知行在所論
都早建帝王州潼關近得平安報父老迎鑿
涕淚收

送端午橋之河南

朱節曾臨嶠灑西中州父老望雲霓榮光已奏
黃河出兵氣應占太白低最憶梁園三尺雪休
論函谷一九泥春生臘盡裏城野七聖重來路
不迷

送夏伯定

殿前折檻尚嶙峋欲挽滔滔又乞身百二山河
秦得地五千甲楯越無人論都計大關宗祏抗
疏名高動搢紳見說曹羈三諫去不堪西望屬
車塵

人日偕徐菊人集安覺寺

追憶壬午與王文敏
集東湖事故詩及之

路轉城隅梵刹開一架裝地勸深杯故人恰並
青春至往事爭如噩夢回精衛冤沈終有海昆
明劫冷但餘灰傷心此日逢人日屈指東湖又
放梅

送管士修之永平府任

豈知雪虐風饕夜繭足寒窗對榻眠野馬塵埃
看世事蠹魚文字說神仙先生去國五百里賤
子從游三十年準擬相從資一噓東臨碣石海

雲邊

浮雲

浮雲蒼狗事俄空百六分明眼底窮江左才人名似錦河西老將氣如虹紛紛王呂談新法籍籍陳甘訟舊功剩有開禧遺恨在南園零落夕陽中

老健坡阻雨寄文仲恭

山行十日五日雨早覺平生憂患多嶺上人家分鞏縣馬前雲氣蔽黃河官齋留客已投轄幕府論兵猶枕戈莫謂機牙形勝地哀勞澤雁近如何

病起登後園閣子

澤國陰多秋雨繁偶扶藜杖趁朝曦湖山盡入

三層閣竹樹全局十畝園礙路蒼藤尤偃蹇衝人白鳥忽飛翻驪山館驛分明似祇欠良朋勸一樽

寄白澄泉

白雲如帆渡湘水我初聞之白曠廬清湘今買千里棹白雲便爲十幅蒲沙汀宿鷺翩初起石壁空青斷欲無可憐几靜窗明地徙倚江天不共渠

岳州旅次初見二毛寄梧生

岳陽樓上獨憑欄昨夜新霜鏡裏看欲塞黃河終有土要除白髮更無丹紬書滿架春燈晚較射連場臘雪乾一笑故人雙鬢改他年握手在長安

辰龍關

辰龍關在辰溪東雙崖巒巒雙蟠龍白雲到地
無一尺青山截天有萬重采入疑探猛虎窟斗
上直躡飛猿蹤溪蠻鑿壁開戶牖行人俯踏炊
烟濃

旅夜書懷寄敬孺家兄

此首刻本在送楊福孫首下

候館宵嚴急柝催山城風雨亦悲哉十年心事
燈前碎半夜難聲枕上來浩蕩江湖漂短褐崢
嶸歲月抵深杯題書已報樓船將早晚從君買
棹回

晚泊鎮江寄張華臣

參旂掩沒斗垂杓獨夜危檣倚次寥岸火微分
京口樹江風直送海門潮鄂君憔悴回青翰季

子淒涼敝黑貂不用江湖愁落魄臨蠻尚有故

人招

頤和園值日道中簡管士一祭酒

簿領侵尋莫憚勞經行處處傍林皋芟荷香裏
漁村遠楊柳陰邊輦路高雨後雲山尤歷歷晚
來車馬尚滔滔從君共乞丹稜泝不著蓑衣也
自豪

卽事

輦路委遲傍禁墉瓜區麻隴綠重重夕陽亂樹
鳴蜩沸野渡孤邨立馬慵瓦礫荒園霾劫燼弓
刀梅隊換軍容祇應檢校齊民術挂甲村中伴
老農

卽墨諸生韓君以所居劃入租界自縊以詩弔

之

老病儒生臥一廛甚堪經經自矢獨貞堅漢家縱有

中行說齊國甯無魯仲連肯為要盟爭舊畔如

聞埋骨卜新阡遺命勿葬租界鰕生枉灑憂時淚抗疏

安能達九天以租界事草疏請院代奏事寢

頤和園值日晚步湖上作

陂塘暑氣未全收晝永還為炳燭游燐燐疏星

縣樹杪垂垂涼露亞禾頭牛羊自返知邨路蚱

蟻羣飛占歲秋負耒躬耕吾夙願直廬擁被數

更籌

簡莘甫

廉州太守真廉吏投劾還鄉天下聞五十未衰

今勝昔尋常不去我慙君詩清獨掩書帷月墨

老頻淤硯渚雲定有文章娛歲莫奴星結柳最

殷勤

鎮雄關

百粵雄關此建瓴亂山回合抱重局雷轟翠峽

江聲怒雨漬黃茅虎氣腥垂老猶衝南紀瘴勒

移深愧北山靈使君辛苦勞相問謝秀山太守又枉

篋輿稅遠坳

自題來鶴樓

伏枕常憂肺病侵北軒秋氣正蕭森山城鼓角

寒逾壯水閣簾櫳晚更深抱甕園中頻入夢墮

車醉後總無心憑欄莫縱登高目觸忤鄉愁恐

不禁

簿領

簿領抽身料有期且從疏懶養衰遲卷簾暝色
留書幌覽鏡秋霜惹鬢絲了了雞蟲分得失區
區草木誤差池稻梁忝竊甯吾分輸與階前病
鶴知

簡吳梅孫

社甕初開濁似膠賓酬主勸若爲豪已憐稚子
通蠻語尚畏春江汎鳩毛樗蔞光陰春未老蘆
笙邨落月初高冗官自有栖遲興俯仰誰能似
桔槔

鎮遠城外作

山爲睥睨江爲濠江流洄洑山周遭鼉鼉曝日
沙洲出蝶螈偃水石梁高洞中覓路如旋螳巖
邊架屋猶粘蠓中元閣上一杯酒柴翁去矣誰

能豪

出城送客簡謝秀山

祇園楸帶縮乘驄邂逅相邀返蠻同瘴雨泔泔
蠻樹黑春人粲粲毳衣紅風花過眼清明後歲
月驚心臥病中一事輸君規措早沅江東下買

逢籠

酬澤之居士

百丈凌兢雨雪寒沅江東會澗江寬青冥直上
緣危徑白勃相持放惡灘簿領抽身今日晚江
湖行路古來難皋橋自有梁鴻廡老我無心賦
考槃

寄王葵園前輩

篋中疏稿墨猶新耆舊中朝孰比倫開拓鶯花

營小鷗鞭笞鸞鳳乞閒身江湖自有垂綸地詩
禮還多發冢人見說沅湘歸雁早秋風蕭瑟獵
青蘋

再入史館簡惲薇孫學士

撮笠猶瞻舊國容官曹僕慙獲相從波濤有筆
慙良史耒耜無田負老農欹枕晚風鳴敗籜卷
簾新月挂疏松飽諳世事成滋味苦憶梁鴻廡
下春

八月二十三日奏封事待漏直廬簡胡素堂御
史

斗柄垂天夜四更觚棱金爵望崢嶸綠槐翳戶
出燈影清露沾衣聞鶴聲敢謂回天誠可掬預
知填海恨難平人中屈軼風裁峻祇覺衰遲愧

友生

寄王飴山

東風已綠汶陽塍遠道懷人感不勝雨帶冷嵐
醒宿酒河添春漲走餘冰天門日觀行行返布
韞青鞋昔昔曾最憶論兵蕭瑟地雪窗永夜共
挑燈

詠蟬和梧生

灌莽園中暑氣微鳴蜩嘒嘒送斜暉未拋紈扇
秋還熱欲傍金莖露已晞木落淮南同此感仙
如丁令不堪歸可憐素鬢俱飄瞥茂草長林願
恐違

奉天城外卽事

百雉城邊返照多提封猶是昔山河沙霾墓道

扶翁仲草沒圍場放駱駝郊野卜年遷寶鼎密
崇伐叛杖天戈園陵松柏應如舊一片昏鴉接
翅過

定興鹿文端公墓下作

道屏城外相公阡宰木參差易水邊人到九京
思士會車過二步憶喬元虞淵落日悲身世蒿
里秋風拜墓田誰識梁園舊賓客塵埃滾滾送
華顛

詠史

質家統系繼兄終一代蒸蒸孝治隆鳧雁未翔
銀海上熊羆猶護翠微中荒唐泗水甯淪鼎寂
寞橋山尚瘞弓復土將軍如昨日園林蕭颯起
秋風

讀三國志董卓傳

戡亂誰爲不世才區區健者亦堪哀桓靈板蕩
將傾廈催泥飛揚未死灰畢竟老奸輸孟德何
曾小鷲屬文臺天心悔禍知無日九域分爭北
已開

春日郊行卽事

步履尋芳底處尋野桃落盡柳成陰條條片片
春如此雨雨風風感不禁老去陶潛惟述酒憂
來阮籍但鳴琴爭如繫日長繩好不放斜陽沒
遠林

團城

團城雲物迥高秋拍岸灤波水綠流尚憶沙堤
鳴委佩遙看畫楫蕩扁舟弓刀袂服千牛衛棹

柘朱門五鳳樓此詩又向昭華潭上過疲驢破帽此淹留

十年

問宋骨之返葵灘縣

十年不見宋夫子馬鬣葬今埋一代文臥病自稱

前進士論交常揖大將軍漆書已訂淹中禮麥

飯誰澆海上墳未記得扁舟相送地義瀨河東下水

汙汙

秋日園居卽事寄通伯

插槿爲籬密復疏籬邊秋潦自成渠荒園斜入

牛羊路老屋平分燕雀居學似耕耘終鹵莽文

餘枝葉未芟除先生舊是滄洲伴夢飲三爻儻

誨予

君方治費易

簡外弟吳辟疆

此首刻本刪

桐城老輩淵源在通伯文章叔節詩賤子論交

慙薄劣郎君下筆擅雄奇相如氣骨人間少延

令家聲海內知一事還應差底近昌黎歲莫送

窮時

遣興

凍雲解駁雪漸微街頭泥滑行人稀風簷瑤琤

冰柱折午窗麗婁寒鳥窺朋比熏爐溫舊語流

連碁局鬪新機何如宴坐南榮下繞屋梅花晝

掩扉

寄龐劬庵中丞

百六初交已挂冠昔趨幕府獲瞻鸞青山獨往

抽身易滄海橫流避世難畦水初平秧馬健篋

書頻曬蠹魚乾從君林下猶無分况作遼東管

送于梓生東歸

壯酒酸齋共晚醒樽前話別君
為情悲涼世事兼身事漸滯風
聲又雨聲自首天涯新歲獻
黃腫海上舊臺平東番臺
笠寧與分不羨同騎款段行

幼安

上元日作

此首列本冊

連袂春人笑語譁市樓燈好看誰家四郊壁壘
兵猶稔九陌塵埃夢自華社酒酸齋酬節物書
窗凍硯送生涯身閒久已忘貞脆不管霜毛鏡

裏加

還灘縣檢孫佩南遺書得其未寄函題以詩
篋裏遺書見故人文章駁難苦斷斷傷心嗣祖
寧非福抵死黔婁未是貧寂歷松楸高冢晚淒
涼薇蕨故園春可憐艸艸還鄉夢酌醴燔魚問
比鄰

徐小山中丞畫像

傍有待立童子
即梧生宮保也

憶昔牀前拜老成知君許國一身輕何期公子

朱顏改已送虞淵白日傾圖畫猶能傳僊偉衣
冠無復睹承平可憐江夏無雙譽老作經師侍
邇英

蓼園詩鈔卷第四

蓼園詩鈔卷第五

膠縣柯劭忞撰

無錫廉泉編

絕句

唐明宗祠

在程符山西南

十載中原儉德臨
朱邪終覺負恩深
一手盪麥飯
無人奠社酒
雞豚父老心

章邱道中

章邱城西風日閑
小車碾路何班班
夕照人家
繡江水春祠
簫鼓女郎山

戎戎雨氣鵝毛白
澗澗湖波薤葉青
又過清明
第三日題詩尚在墨王亭

新城書院卽事

柿葉初丹槲葉黃
亂松高下綠千章
籠煙暮雨尋常好
不及深秋一夜霜
敬孺長兄長江霽雪圖

寒雲叫鶴天蕭瑟
斷葦漁罾岸次寥
獨倚舵樓望京口
夕陽微沒蒜山椒

時予客鎮江

一生恐老江湖役
尺幅休論筆墨工
誰念西園舊昆弟
夜闌炳燭雪聲中

又魚子簡徐伯縉

同是東西南北人
天涯蹤迹又相親
一生出入知何地
今日方過魚泣津

記夢

梧桐小院三更雨
絡緯空房四壁燈
枕斂衾推君不見
山長水遠夢猶能

箱簾寂寞青娥怨
滕屨淒涼素鬢愁
涪萬東浮猶萬里
鴛鴦磯畔一孤舟

緯夫詞

灘心亂石如亂麻
灘邊削壁如削瓜
攀躋尺寸不得上
日出搬灘到日斜
巴中之峽連巴東
青山截天有萬重
猿猱趨捷吾羨汝
攀林挂石何雍容
尺路蟠天一藕絲
直從涪萬達荆施
處處嘔啞牽百丈
略似巴人唱竹枝

瀘州

浩蕩真成萬里游
戎州東下是瀘州
青山兩岸中江口
碧瓦三層南定樓
往事凋訛亦可哀
江干帶藻復衣苔
瀘州最是

新霜早零落棹花孝子臺

題袁錫臣行草冊子

敬事堂前西閣子黃梅花下看臨池蘭亭筆法
何人得恐是當年智永師

草書苦學董香光仿佛蛾眉鏡裏妝絕代娉婷
風韻老更教詩格近漁洋

過湘陰縣黃陵廟

黃陵廟外雨潺湲帝子魂歸想佩環一櫂但隨

湘水轉望中何處九疑山

岳州城外作

汨汨暗浪生柔櫓淼淼平湖上遠燈何處雙魚
問消息天涯蹤跡又巴陵

宣武城南古剎荒梧桐月落弔寒蟿無端又作

癸酉余在巴陵寄內子詩莫遣雙魚斷消息洞庭北岸是巴陵

巴陵客斗覺今宵客夢長

三絕句

飛龍關倚邛山下蠻煙瘴雨埋黎雅河中黑水
不生魚坂上黃泥能沒馬

曬經臺前一片石蝸牛涎絡朱螿絲味三十六旬
終日雨當年那有曬經時

舊州四姓猓羅蠻落日朱旂暗九關誰似當年
周達武橫行獨入大涼山

涑水縣石龜山

遼家梵宇尚巖阿嵎嶼香台挂薜蘿一事偏餘
千古恨石幢年號紀宣和

簡郭子嘉丈

嘉陵江路三百里巫峽雲山十二峯老去聽漪

亭上臥一編金石且從容

涪水西經濟薄瀾水經舊注記酈元涪源擬問

聽涪子何似城東木苗村

和郭湘帆

灞陵射獵故將軍躍馬彎弓百戰身不使樊鄴

遇高帝封侯李蔡下中人

早年曾拜陸平原海內文章許共論十載蹉跎

歸計晚青莎雜樹滿西園

湖上晚興

闕伯祠前鐘滿林昇仙臺上天垂陰秋風欲傍

白蘋起暝色偏從紅蓼深

長鏡雨雪凍皴客短楫菰蒲豪橫游曾向湖邊

問漁釣路人應識小丹邱

成都雜憶

一枕春寒聽子規成都二月海棠時渭南老子

堂堂去祇有王郎七字詩王廉生詩一枕春寒天欲曙幾人愛聽子

王李詩名舊址壇齊梁格律等閒看圓明爭擬

元才子那及愁連續被寬王壬秋

廿泉鄉人門下士校勘丹黃勝著書聞道君家

獻徵錄而今流落鮑蟬魚錢隄江

我憶南皮張侍郎十年種樹已成行巴蕉展雨

縱橫綠橘袖含風浙瀝黃

子苾風流接燕庭刁家錢肆事零星五銖合背

從來少獨惜匆匆過甕亭中州掘地獲合背五銖十許枚

七十詩人顧復初詩懷酒量總渠渠最憶相逢

甘

昭覺寺樽前乞作八分書

唐人寫經天下少新從佛寺得開皇六丁下取
有殘牘流落人間稱墨王

載酒東湖問故園梅花香裏勸清尊文章一代

周林汲虎豹斑斑有子孫周少農

來攀蜀道青天路去騁梁園白雪詞誰似餘姚

楊伯子能於杼寫見雄奇楊馥孫

新繁寺裏雪堂師萬樹梅花萬首詩記得當年

人日作龕燈挑盡夜眠遲

馥孫作雪裏梅花扇面成都無雪戲作一詩

暖意初回臘向殘垂垂一樹亞江干登樓望見

西山雪始信梅花破早寒此首刻本在瀘州二絕下

張韻舫眠琴室填詞圖

即事
晚涼薤葉空牀簟斜日梧桐
別院砧憑藉濁醪永今夕鏡
中衰髮莫侵尋

莞榻筠疏清晝陰自填簫譜自鳴琴無絃笑殺

仇仁近仇詞名無絃琴譜那有成連海上心

寄梧生

恆陰不雨氣沈頹自策疲驢出近關語鶻今朝

頻送喜青天白日看郎山

趙伯康晝雨後秋海棠極零落之態作詩題之

十年不到王恭廠最憶寒花傍砌垂小院回廊

應似舊卻從晝裏見歲鞋

夜雨寒燈一穗昏蟲聲淒切與招魂無人更弔

胭脂井賸有紅綃拭淚痕

三絕句

暝色郊原歸鳥疾火雲遼窠掩落日巾車不用

趁新涼挂甲邨邊泥沒膝

樹杪燈懸塔天邊斗挂城雲霞川漲晚風露野
香生

葭菼晚蒼茫無風自覺涼行人衝蚱蜢草露滿
衣裳

郭心正文墓

下作

聽清亭上昔論文觸忤風懷趁酒醺無數寒鴉

宿衰柳城西重過故人墳

君詩幾樹碧桃零落
盡空餘衰柳宿寒鴉

為時
所稱

莫送難詞

莫送難前鼓角悲石人嶺上路逶迤勸君莫送
東西客到處相逢怕別離

雪湧雷奔莫送難江湖行路古來難分明二十
年前事祇作難頭送客看

寶沈庵上元夜宴圖

圖作於庚戌癸
丑屬予補題

酒為春寒漱澀斟昔年賓客昔園林馬行燈火
尋常事觸忤東坡感舊心

清歡一夕擲東流老懶誰能遣百憂記得前年
披畫讀風燈過眼雪盈頭

村居卽事

十月田家已滌場一羣飢雀啣枯桑曉來海氣
沈沈紫半是魚龍半是霜

趙伯綱畫扇面

采采蒹葭夜有霜平湖烟水迥蒼茫畫圖仿佛
陳家渡一葉風帆過沔陽

徐總統畫江湖垂釣冊子

箬笠蓑衣一釣竿白蘋洲渚寫荒寒不知漁父

住何處七十二沽煙水寬

種膠州白菜

翠葉中苞白玉肪嚴冬冰雪亦甘香園官不用
誇安肅風味依稀似故鄉

讀北周書

將軍駟臥洛陽城白挺能驅十萬兵一任焦梨
來齧索老羆空與貉相爭王羆

玉壁威名天下聞晚年又策相州勦關西男子
籠東甚也佐楊家盜宇文章孝寬

詠史

撝戈遽挽日西傾社稷安危仗老成不信書生
能誤國功名造次誤書生

車聲過闕日麟麟竟說旄頭彗紫宸霑灑縱無

嵇紹血虎門端委又何人

卽事

鳳凰樓畔草如茵帕首偏多繫馬人愁絕當年
庚開府江南風景又新春

贈文星階閣學

雞人踞日啓彤闈雪滿貂裘瀑直歸一自鼎湖
弓劍遠侍臣典盡舊朝衣

沈詠孫畫

江村迤邐帶平蕪暝色樓臺闌欲無怪底連翩
沙雁起一星漁火出菰蒲

劉文清公槎河山莊卽事詩卷子

芋栗園官歲入多依山傍海築槎河樓臺鼎鼎
休相擬老作詩人占菜蕪

題陳梅村書札後

世運推遷劇轉輪篋中書尺墨猶新知君不是
王夷甫也識東門倚嘯人

題松小夢殘荷野鴨扇面

晚晴紅芰鬪嬌燒畫裏應添白鷺翹無限斜陽
穿破綠鳧翁也自著風標

輓奉新張忠武公

白首論兵氣益振功名何必畫麒麟可憐擴廓
奇男子百戰終全牖下身

連雲甲第化煙埃想見將軍血戰回嗚咽菖蒲
河裏水十年流盡劫餘灰

書沈子敦侍郎書札後

一髮誰將九鼎扶議刑議禮總區區諸生枉自

爭鹽鐵時論終歸桑大夫

古來學杜得其神髓者無如義山後山一千年
後乃得夢園三復此編當知此言非溢美也觀翁

丁亥秋重過金泉精舍留信宿而去追懷曩昔口占二絕句記之

獨掩書帷別短檠竹窗蕭檝送秋聲可憐巾卷俱零落老我金泉閉戶生

書卷成堆懶不收天邊新月上斜樓予昔肄業所居誰知樹影泉聲裡別有當年一段秋

乙丑冬十月以新刻本比勘一過

萬里

蓼園詩鈔卷第五

蓼園詩鈔校勘記

目錄

第二葉第七行親音山當作觀音山

卷第一

第一葉第六行屢當作屢

第七行悒悒讀書廬自定本作井

甃隆蒼苔

第十一行酌當作酌

第二葉第二三行側聞授鉞時盈廷濫推

擇自定本作側聞推轂時倉卒

非所擇

第四五行忝蒙一日知自定本作

芻蕘何所獻

第十七行豐豐當作豐豐

第八葉第三行而余游宦士自定本作而
余倦游士

第九葉第廿行賭當作賭

第十一葉第廿四行已覺衣裘重自定本作
已覺被裘重

第十二葉第二行天贈風日美自定本作天
昇風日美

第十五葉第廿二行梵閣共攀登自定本作
梵閣試攀登

第十七葉第一行鳴當作鳴

卷第二

第五葉第廿二行急當作意競當作競

第六葉第五行鯁當作鯁

第十葉第廿行鬪當作鬪

第廿六行剖當作剖

第十一葉第三行而乃得人和自定本作勿
乃得人和

第十三行坵當作坵

第十二葉第五行下靡字當作子毘當作毘

第十六行釜中更有丹砂飯自定
本作新炊更有丹砂飯

第十三葉第一行呼當作呼

第十二行豈獨山靈笑頑懦自定
本作豈獨山靈笑頑惰

第廿一行柏當作拍

第廿三行剔當作剔

第十五葉第一行烏當作鳥

第六行芊當作芊

第十六葉第三四行擁書萬卷盡名城金石

旁撥椎搨古自定本作卷帙紛

綸擁百城鼎彝班駁尊三古

第十七葉第廿六行請君為作籌邊圖自定

本作請君為作從軍圖

第三十葉第十八行躬耕何必耕酈亭自定

本作躬耕何必耕道屏

卷第二

第二葉第十三行放梵隨僧起迷曛看鳥

還自定本作客有尋碑至僧餘

乞米還

第十四行撥置儻餘閑自定本作

撥置儻能閑

第七葉第二行步履訪茅茨幽尋藉自怡

自定本作郭外訪茅茨經過閒

自怡

第三四行猶堪慰良夜共讀故人

書自定本作力田詢況賈更欲

到臨淄

第八葉第廿三行師友俱遺直自定本作

師友稱遺直

第九葉第十八行開當作聞

第廿二行移家居畏壘自定本作

耕巖尋谷口
第十葉第十九行澤當作滓

第十二葉第十四行沓浪際層陰自定本作

沓浪自成陰

第十八行乘槎唐藍在卓錫漢使

還當作卓錫唐藍在乘槎漢使

還

第十七葉第十九行閑當作闌

第十九葉第八行近當作返

第二十葉第一行咸池終浴日自定本作摻

祛知有日

第五行克當作覺

卷第四

第五葉第廿四行明當作朋

第九葉第十三行旅當作旅

第十一葉第廿五行獨倚危檣眺沱寥自定

本作獨夜危檣倚沱寥

第十二葉第一行不用江湖愁落魄臨鬢返

稅共漁樵自定本作不用江湖

溷蹤跡臨鬢尚有故人招

第十四葉第五行北去京華猶萬里不須歸

夢訴倥偬自定本作一事輸君

規措早沅江東下買蓬籠

第八行瘴雨泔泔逼臘殘自定本

作百丈凌兢雨雪寒

第十六葉第七行事當作處

第十七葉第十一行閒居歲月足盤桓自定

本作昔年幕府獲驂鸞

第十六行袂服春人笑語譁自定

本作連袂春人笑語譁

卷第五

第二葉第一行秋當作愁

此本印成得見蓼園老人自定本字句間
有異同蓋老人隨時改易者也錄入校勘
記
記埃再版時改正甲子春分後二日廉泉



中華民國十三年四月 日初版

定價大洋二元



版權所有

代售所	印刷所	行者	助資印	校勘者	編錄者	著作者
各省中華書局	上海中華書局	潘	靳	吳	俞	柯
			雲	闓		劭
		復	鵬	生	復	泉
						恣

1871
1872
1873
1874
1875
1876
1877
1878
1879
1880
1881
1882
1883
1884
1885
1886
1887
1888
1889
1890
1891
1892
1893
1894
1895
1896
1897
1898
1899
1900

1871
1872
1873
1874
1875
1876
1877
1878
1879
1880
1881
1882
1883
1884
1885
1886
1887
1888
1889
1890
1891
1892
1893
1894
1895
1896
1897
1898
1899
1900

